

MESYUARAT KEDUA, PENGGAJ KEEMPAT
PARLIMEN KEEMPAT BELAS
2021

HARI ISNIN : 15 NOVEMBER 2021

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 10 HINGGA NO. 41)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : Y.B. TUAN NGA KOR MING
[TELUK INTAN]
TARIKH : 15 NOVEMBER 2021 (ISNIN)

SOALAN

Tuan Nga Kor Ming [Teluk Intan] minta **MENTERI KEWANGAN** menyatakan secara terperinci apakah langkah-langkah yang sedang diambil oleh Kerajaan untuk menyelesaikan hutang isi rumah yang kini telah meningkat ke USD 328.7 bilion atau 93.3% KDNK negara.

JAWAPAN

Tan Sri Yang di-Pertua,

1. Berdasarkan laporan Tinjauan Kestabilan Kewangan Separuh Pertama Tahun 2021 yang diterbitkan oleh Bank Negara Malaysia (atau BNM) pada 29 September yang lalu, pada akhir Jun 2021, hutang isi rumah adalah lebih dari 1.34 trilion ringgit, atau 89.6 peratus daripada KDNK. Ini merupakan penurunan berbanding tahap yang dicatatkan pada Disember 2020, iaitu 93.2 peratus.
2. Walaupun tahap keberhutangan isi rumah dilihat sebagai membimbangkan, namun, salah satu faktor yang menyumbang kepada hutang isi rumah adalah berkait dengan pembinaan kekayaan. Sebagai contoh, sekitar 70 peratus daripada pinjaman baru pada separuh pertama tahun ini disalurkan kepada golongan pendapatan menengah dan ke atas, di mana 40 peratus daripada jumlah ini adalah berkait dengan pembelian hartanah.
3. Selain itu, kebanyakan isi rumah masih meminjam mengikut kemampuan mereka dengan nisbah khidmat hutang atau dengan izin, *Debt Service Ratio (DSR)*, kekal dalam lingkungan paras berhemat. Ini disokong oleh daya tahan kewangan isi rumah dengan penampakan kewangan yang mencukupi. Setakat ini, nisbah aset kewangan isi rumah kepada hutang kekal pada paras 2.2 kali, melebihi ambang berhemat sebanyak 1 kali ganda.
4. Faktor lain yang turut menyumbang kepada kemampuan pembayaran balik hutang isi rumah termasuklah pengurangan Kadar Dasar Semalaman, atau dengan izin, *OPR* sebanyak 125 mata asas sejak Januari 2020. Ini telah mengurangkan ansuran pinjaman bulanan bagi kebanyakan peminjam isi rumah, di mana lebih kurang 70 peratus daripada hutang mereka adalah dalam bentuk pinjaman kadar terapung.

Tan Sri Yang di-Pertua,

5. Tidak dinafikan, kesan peningkatan kadar hutang isi rumah yang tidak terkawal boleh menimbulkan kekangan kepada pertumbuhan ekonomi pada masa hadapan, kerana sebahagian besar daripada pendapatan mereka perlu digunakan untuk membayar hutang. Ini secara tidak langsung akan menyebabkan pendapatan boleh guna isi rumah berkurangan, seterusnya memberi kesan ke atas perbelanjaan terhadap barangan dan perkhidmatan asas yang lain.

6. Namun, susulan kejayaan Pelan Pemulihan Negara (PPN) dan Program Imunisasi COVID-19 Kebangsaan (PICK), kesan tahap keberhutangan isi rumah terhadap ekonomi dijangka terkawal. Ini didorong oleh pembukaan semula sektor ekonomi dan aktiviti sosial dengan lebih meluas susulan peralihan lebih banyak negeri ke Fasa 4 PPN. Kini, lebih 90 peratus sektor ekonomi sudah mula beroperasi, dan kita dapat lihat pemulihan di dalam pasaran buruh, termasuk pertumbuhan berterusan guna tenaga dan upah. Setakat September 2021, kadar pengangguran terus bertambah baik kepada 4.5 peratus, di mana bilangan penduduk bekerja terus meningkat sebanyak 86,900 orang, dengan jumlah 15.46 juta orang.

7. Pada masa yang sama, Kerajaan telah memperkenalkan pelbagai bantuan bayaran balik pinjaman sama ada secara menyeluruh atau bersasar, termasuklah perlindungan dari segi perundangan melalui Akta Langkah-Langkah Sementara bagi Mengurangkan Kesan Penyakit Koronavirus 2019 (Covid-19) 2020 [Akta 829]. Ini turut dilengkapi oleh bantuan tunai langsung untuk rakyat berjumlah 33 bilion ringgit yang telah memanfaatkan lebih dari 10 juta penerima.

8. Melangkah ke hadapan, dengan momentum pemulihan ekonomi yang dijangka akan berterusan sepanjang suku keempat 2021 hingga ke hujung tahun hadapan, Bajet 2022 tetap memastikan kesinambungan bantuan tunai secara langsung berjumlah 8.2 bilion ringgit, memanfaatkan 9.6 juta penerima. Selain itu, Kerajaan juga memperuntukkan 4.8 bilion dalam menyediakan 600 ribu peluang pekerjaan pada tahun hadapan di bawah inisiatif Jamin Kerja Keluarga Malaysia.

Tan Sri Yang di-Pertua,

9. Dalam mengurangkan risiko peningkatan hutang isi rumah, serta meningkatkan kesedaran rakyat mengenai pengurusan kewangan secara berhemah, Kerajaan dengan usaha sama Bank Negara akan:

- **Pertama**, terus melaksanakan Garis Panduan Pembiayaan Bertanggungjawab, atau dengan izin *Guidelines on Responsible Financing*) untuk membantu memastikan individu meminjam mengikut kemampuan masing-masing untuk mengelakkan bebanan hutang yang berlebihan; dan
- **Kedua**, berusaha meningkatkan tahap celik kewangan rakyat agar pengguna perkhidmatan kewangan mempunyai keupayaan dan berkeyakinan untuk membuat keputusan kewangan yang baik. Ini akan diusahakan melalui pelbagai inisiatif di bawah Jaringan Pendidikan Kewangan, atau dengan izin, *Financial Education Network* (atau FEN).

10. Di samping itu, Kerajaan juga menggalakkan penggunaan perkhidmatan **Agensi Kaunseling dan Pengurusan Kredit** (atau AKPK) oleh isi rumah dan Perusahaan Mikro, Kecil dan Sederhana yang mempunyai masalah pengurusan hutang untuk mempunyai tahap kewangan yang kukuh melalui pendidikan, khidmat nasihat kewangan serta khidmat pengurusan kredit.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN RAMLI BIN DATO' MOHD NOR
(CAMERON HIGHLANDS)**

TARIKH : 15 NOVEMBER 2021 (ISNIN)

SOALAN

TUAN RAMLI BIN DATO' MOHD NOR minta **MENTERI KANAN PENDIDIKAN** menyatakan apakah langkah yang dilakukan oleh setiap Jabatan Pelajaran Negeri bagi memastikan tidak berlaku pencairan maklumat kepada pegawai pelajaran daerah, pengetua, guru besar dan guru-guru, khasnya di sekolah yang ada murid Orang Asli dan juga sekolah pedalaman.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memastikan setiap maklumat berkaitan pendidikan dan pengoperasian institusi pendidikan bawah KPM khususnya di sekolah Orang Asli dan pedalaman disampaikan dengan tepat, cepat dan efisien.

Untuk makluman Ahli Yang Berhormat, KPM menyalurkan maklumat melalui beberapa kaedah antaranya siaran media, media sosial, surat siaran dan surat pemakluman. Penyaluran maklumat yang perlu disampaikan dengan cepat akan dibuat melalui hebahan segera. Surat siaran dan surat pemakluman diberikan kepada Jabatan Pendidikan Negeri (JPN) yang kemudiannya dipanjangkan kepada Pejabat Pendidikan Daerah (PPD). Pada masa yang sama, pegawai di KPM atau JPN akan mengadakan mesyuarat dan sesi libat urus kepada pegawai pelajaran daerah, pengetua, guru besar dan guru bagi memberikan penerangan yang lebih terperinci mengenai maklumat yang dihebahkan. Pemantauan secara berkala di lapangan turut dilaksanakan oleh pegawai bagi mengenal pasti isu yang dihadapi oleh pihak sekolah dalam melaksanakan arahan, dasar dan peraturan yang dihebahkan.

KPM komited untuk memastikan semua guru mendapat akses maklumat yang terkini dalam melaksanakan pengoperasian institusi pendidikan KPM.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KE-EMPAT
PARLIMEN KE-EMPAT BELAS**

PERTANYAAN : JAWAB LISAN

**DARIPADA : YB TUAN NOOR AMIN BIN AHMAD
(KANGAR)**

TARIKH : 15 NOVEMBER 2021 (ISNIN)

SOALAN

TUAN NOOR AMIN BIN AHMAD [KANGAR] minta **MENTERI PENGANGKUTAN** menyatakan sama ada jeti Kuala Perlis akan dibesarkan dan jumlah perkhidmatan dan kekerapan feri akan ditambah dalam RMK-12.

JAWAPAN

Tuan Yang di-Pertua,

Feri penumpang dari Kuala Perlis ke Langkawi beroperasi dari Jeti Penumpang Kuala Perlis yang terletak di muara Sungai Perlis. Jeti Penumpang Kuala Perlis ini pernah dinaik taraf pada tahun 2014 dan 2015 serta dari masa ke semasa melaksanakan penyelenggaraan dan pembaikan kecil. Jumlah kapasiti penumpang di ruang menunggu telah ditingkatkan daripada 300 penumpang kepada 800 penumpang (jumlah kerusi 500 unit).

Pertambahan kekerapan bagi perkhidmatan Feri dan RORO sentiasa menjadi keutamaan Kementerian Pengangkutan Malaysia. Melalui agensi Kementerian iaitu Jabatan Laut Malaysia (JLM), perbincangan bersama operator feri dan RORO kerap dijalankan bagi mengenalpasti keperluan pertambahan perjalanan feri dari Jeti Kuala Perlis ke Pulau Langkawi. Antara perkara utama adalah memastikan perjalanan Feri tidak terjejas dan kedalaman air adalah selamat untuk belayar.

Dalam hubungan ini, JLM telah melaksanakan kerja-kerja pengerukan alur pelayaran secara berkala bagi memastikan alur pelayaran dan lembangan dalam keadaan selamat untuk belayar. Kerja-kerja pengerukan berkala telah dilaksanakan pada tahun 2003, 2006, 2010, 2014 dan 2018 di bawah Rancangan Malaysia. Terkini, pada sesi permohonan projek baharu dalam RMKe-12, JLM telah menyenaraikan permohonan projek Kerja-Kerja Pengerukan di Alur Pelayaran dan Basin Jeti Penumpang Kuala Perlis sebagai senarai keutamaan projek di bawah JLM.

JLM kini sedang menjalankan proses tender kerja-kerja pengerukan berkala. Skop kerja pengerukan meliputi pengerukan mendalamkan basin (hadapan) jeti Kuala Perlis dan juga alur pelayaran sepanjang 9 km pada kedalaman 4.0 meter *Chart Datum* (CD) dan 70 meter lebar. JLM sentiasa komited dalam memastikan keselamatan alur pelayaran di jeti-jeti utama adalah di tahap maksimum dengan melaksanakan kerja-kerja pengerukan

secara berkala. Projek pengerukan ini dapat meningkatkan keselamatan pelayaran feri penumpang, nelayan dan pengusaha bot di perairan tersebut. Projek pengerukan ini juga memberi manfaat secara langsung kepada penduduk setempat seperti nelayan, pengusaha bot dan feri pelancongan, pengusaha bot-bot rekreasi dan juga kepada pedagang-pedagang.

Pengerukan ini juga dilihat akan memberi kesan positif kepada peningkatan pelancong khususnya ke Pulau Langkawi dari dalam dan luar negara. Secara dasarnya projek ini dapat meningkatkan pelbagai sektor ekonomi serta meningkatkan taraf sosio-ekonomi penduduk setempat.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' SERI HAJI IDRIS BIN JUSOH
[BESUT]**

TARIKH : 15 NOVEMBER 2021 (ISNIN)

SOALAN

minta **MENTERI KOMUNIKASI DAN MULTIMEDIA** menyatakan apakah langkah yang diambil Kementerian menerusi inisiatif JENDELA, khasnya dalam meningkatkan lagi capaian dan kesalinghubungan Internet di kawasan-kawasan luar bandar.

JAWAPAN:

Tuan Yang Dipertua,

Untuk makluman Ahli Yang Berhormat, kerajaan melalui Suruhanjaya Komunikasi dan Multimedia Malaysia (SKMM) telah membuat perancangan dan kini sedang giat melaksanakan pelan pembangunan infrastruktur komunikasi yang dinamakan Pelan Jalinan Digital Negara (JENDELA) bertujuan untuk menambah baik perkhidmatan komunikasi.

Pelaksanaan pelan JENDELA Fasa 1 yang bermula pada September 2020 memberi fokus kepada peluasan liputan gentian optik dan pembangunan infrastruktur digital termasuk pembinaan tapak 4G baharu dan menaik taraf stesen pemancar sedia ada kepada 4G bagi meningkatkan liputan dan kualiti perkhidmatan 4G di seluruh negara. Pencapaian JENDELA sehingga suku ketiga 2021 seperti berikut:

- a) Penambahan sebanyak 1.47 juta premis daripada 4.95 juta premis yang menjadikan jumlah keseluruhan sebanyak 6.43 juta premis di seluruh negara telah disediakan dengan akses gentian optik;
- b) Kelajuan jalur lebar mudah alih meningkat daripada 25 Mbps kepada 31.34 Mbps; dan
- c) Peluasan liputan jalur lebar mudah alih 4G daripada 91.8% kepada 94.39% di kawasan berpenduduk sehingga suku kedua 2021.

Pihak kerajaan juga sedang dalam proses untuk menutup rangkaian 3G agar spektrum yang digunakan dapat digunakan untuk meningkatkan kecekapan perkhidmatan teknologi 4G yang dapat menyediakan kelajuan capaian internet yang lebih tinggi. Sehingga 30 September 2021, sebanyak 1.2 juta pelanggan 3G sedia ada telah beralih kepada 4G dan 78,000 rangkaian 3G telah ditutup untuk menambah baik liputan dan kualiti perkhidmatan teknologi 4G.

Pelaksanaan JENDELA bukan sahaja tertumpu di kawasan-kawasan bandar, malah turut mengambil kira penyediaan infrastruktur digital di kawasan-kawasan luar bandar dan pedalaman melalui program Pemberian Perkhidmatan Sejagat (USP) seperti berikut:

- a. Melalui kaedah penyumbang utama, sebanyak 362 menara baharu akan dibina menjelang penghujung 2022 yang akan meningkatkan kadar liputan 4G di kawasan berpenduduk di seluruh negara. Di samping itu, sebanyak 1,661 menara baharu akan dilaksanakan secara kaedah tender terbuka di kawasan-kawasan luar bandar dan pedalaman di seluruh negara melalui pelantikan Penyedia Perkhidmatan Sejagat yang Dilantik atau *Designated Universal Service Provision* pada suku keempat 2021 untuk melonjakkan lagi kadar liputan 4G kepada 96.9% di kawasan berpenduduk di seluruh Malaysia, penghujung 2022 nanti.

- b. Manakala di kawasan pedalaman di Sabah dan Sarawak serta perkampungan Orang Asli, penyediaan perkhidmatan jalur lebar akan dipercepat melalui penyediaan perkhidmatan jalur lebar secara kolektif menggunakan teknologi satelit. Bagi tujuan ini, sebanyak 839 lokasi di seluruh negara telah dikenal pasti bagi memastikan liputan jalur lebar dapat diberikan di kawasan-kawasan yang sukar diakses dengan teknologi gentian optik dan mudah alih.

Secara umumnya, pelaksanaan kesemua inisiatif JENDELA ini telah bermula sejak September 2020 dan inisiatif yang dalam perancangan akan siap secara berperingkat sehingga penghujung 2022. Manakala bagi perkhidmatan jalur lebar menggunakan teknologi satelit kini dalam proses pelaksanaan dan dijangka akan siap secara berperingkat bermula November 2021 sehingga awal 2022.

Peratusan liputan 4G di kawasan berpenduduk di seluruh negara telah meningkat kepada 94.39% setakat suku ketiga 2021 berbanding 91.8% sebelum pelaksanaan JENDELA. Selain itu, usaha penambahbaikan rangkaian akan diteruskan untuk memberikan kualiti pengalaman yang lebih baik kepada pengguna.

Para pengguna disaran untuk melayari portal JENDELA Map (<https://jendela.my>) yang telah dilancarkan pada Julai lepas bagi melaporkan lokasi yang kurang mendapat liputan agar boleh dimasukkan untuk perancangan masa hadapan. Maklumat yang diperolehi daripada pengguna secara terus secara sumber khalayak dapat digunakan sebagai maklumat bagi membuat perancangan penambahbaikan liputan dan kualiti perkhidmatan jalur lebar dari semasa ke semasa.

Tuan Yang Dipertua,

Selain pembinaan menara-menara telekomunikasi dan satelit, pihak kerajaan akan turut melaksanakan Penyediaan infrastruktur jalur lebar menggunakan kaedah *Point of Presence* (PoP) hab gentian optik yang merupakan salah satu alternatif dalam memastikan jaringan dan liputan infrastruktur jalur lebar dapat diperluas ke kawasan sekitar sekolah dan berpenduduk dengan lebih baik.

Pelaksanaan ini akan menjadikan lokasi berhampiran sekolah luar bandar sebagai hab untuk menyediakan infrastruktur jalur lebar gentian optik untuk kegunaan sekolah, kawasan perindustrian, premis-premis kerajaan berhampiran dan masyarakat sekelilingnya. Pelaksanaan PoP bagi Fasa 1 akan melibatkan 630 lokasi berhampiran sekolah manakala bagi Fasa 2 pula akan melibatkan 3,693 lokasi berhampiran sekolah di kawasan luar bandar di seluruh negara. Sekurang-kurangnya sebanyak 432,300 premis akan menerima perkhidmatan jalur lebar berkelajuan tinggi apabila projek ini siap menjelang akhir RMK-12 tahun 2025. Sebanyak 224 PoP di kawasan luar bandar di negeri Terengganu dan daripada jumlah tersebut pula sebanyak 15 adalah di Parlimen Besut.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : YB DR. ONG KIAN MING [BANGI]

TARIKH : 15 NOVEMBER 2021 (ISNIN)

SOALAN

Minta **MENTERI PENGAJIAN TINGGI** menyatakan jumlah pembayaran balik pinjaman PTPTN oleh pelajar dan bayaran faedah oleh PTPTN ke atas pinjaman untuk tahun 2020 dan tahun 2021 (statistik terkini) dan polisi yang akan diambil untuk memperkukuh kedudukan kewangan PTPTN.

JAWAPAN

Tuan Yang di-Pertua,

Bagi tempoh dua tahun terkini, PTPTN telah menerima **bayaran balik** pinjaman sebanyak lebih RM2.94 bilion, merangkumi RM1.35 bilion untuk tahun 2020 dan RM1.59 bilion untuk tahun 2021, iaitu sehingga 30 September. Dengan mengambil kira pelaksanaan penangguhan bayaran balik pinjaman yang dilaksanakan berikutan penularan wabak COVID-19, jumlah keseluruhan kutipan bayaran balik pinjaman PTPTN yang telah diterima sehingga 30 September 2021 adalah kira-kira RM22.53 bilion.

Dari segi **bayaran faedah** oleh PTPTN ke atas pinjaman pula, untuk tahun 2020 dan tahun 2021, sehingga 30 September 2021, lebih RM2.5 bilion bayaran faedah yang telah dikenakan, merangkumi bayaran kos keuntungan atau faedah pembiayaan dan bayaran Kos Kupon ke atas Sukuk PTPTN.

Untuk makluman Ahli Yang Berhormat, PTPTN telah merangka beberapa strategi bagi memastikan kelestarian dana pembiayaan PTPTN antaranya:

- (i) **Memperhebatkan strategi meningkatkan bayaran balik pinjaman dengan mempelbagaikan saluran strategik dan inovatif.** PTPTN menyediakan pelbagai platform pembayaran bagi memudahkan peminjam membuat pembayaran balik termasuk bayaran balik sama ada melalui kaunter, perbankan internet dan juga bayaran secara dalam talian.
- (ii) **Memberikan insentif diskaun bayaran balik pinjaman PTPTN 10 hingga 15 peratus** bermula 1 November 2021 hingga 30 April 2022 kepada peminjam yang layak;
- (iii) **Melaksanakan perkongsian data dalam kalangan agensi** bagi memperhebat kutipan bayaran balik daripada mereka yang berada di sektor swasta dan bekerja sendiri. Kerjasama telah dilaksanakan dengan beberapa buah agensi seperti Jabatan Akauntan Negara (JAN), Urusan Gaji Angkatan Tentera (UGAT), Kumpulan Wang Persaraan (KWAP) dan majikan swasta untuk membuat potongan gaji kakitangan mereka;
- (iv) **Menggalakkan kerjasama dengan kerajaan negeri.** Pelbagai kempen juga telah dilaksanakan bagi menggalakkan bayaran balik, yang terkini ialah insentif Kerajaan Negeri Sarawak membantu membuat bayaran balik tambahan sebanyak 30 peratus lagi kepada peminjam anak Sarawak yang telah membuat bayaran sekurang-kurangnya 30 peratus daripada jumlah keseluruhan pinjaman; dan
- (v) **Mengurangkan kebergantungan kepada pinjaman pendidikan melalui simpanan pendidikan melalui akaun Skim Simpanan Pendidikan Nasional (SSPN).**

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : YB DATO' DR. MOHD KHAIRUDDIN BIN
AMAN RAZALI [KUALA NERUS]
TARIKH : 15 NOVEMBER 2021 (ISNIN)

SOALAN

DATO' DR. MOHD KHAIRUDDIN BIN AMAN RAZALI [KUALA NERUS]
minta **MENTERI KEWANGAN** menyatakan perancangan jangka masa panjang Kementerian dalam menyediakan suatu tabungan yang stabil dan lestari untuk menunaikan komitmen bayaran emolumen setiap tahun memandangkan kedudukan fiskal negara pada ketika ini berada dalam keadaan yang kritikal.

JAWAPAN

Tan Sri Yang di-Pertua,

1. Untuk makluman ahli Yang Berhormat, emolumen bagi penjawat awam diperuntukkan di bawah belanja mengurus Kerajaan Persekutuan yang dibiayai melalui Akaun Hasil Disatukan. Sumber bagi Akaun Hasil Disatukan ini kebanyakannya adalah menerusi kutipan hasil tahunan, yang disumbang terutamanya oleh hasil cukai Kerajaan. Oleh yang demikian, sebagaimana yang termaktub dalam Perlembagaan Kerajaan Persekutuan, kesemua perbelanjaan mengurus (atau OE) harus dibiayai dengan hasil, dan tidak boleh dibiayai dengan pinjaman.

2. Kerajaan amat peka dan proaktif dalam memastikan hasil yang mampan dalam jangka masa pendek dan panjang. Dalam hal ini, bagi memastikan kutipan hasil yang mencukupi untuk menampung perbelanjaan mengurus, maka Kerajaan perlu melaksanakan strategi meningkatkan hasil serta strategi mengawal perbelanjaan Kerajaan.

Tan Sri Yang di-Pertua,

3. Dalam memperluaskan hasil Kerajaan, dan sebagai tambahan kepada unjuran hasil melalui kutipan cukai dan bukan cukai yang berjumlah 234 bilion ringgit, atau 14.3 peratus kepada KDNK untuk tahun 2022, Bajet 2022 juga telah mengumumkan langkah cukai seperti:

- a. pengenaan cukai pendapatan kepada pemastautin di Malaysia ke atas pendapatan yang terbit daripada sumber di luar negara dan diterima di Malaysia mulai 1 Januari 2022;
- b. pengenaan duti eksais terhadap produk cecair atau gel mengandungi nikotin yang digunakan dalam rokok elektronik dan vape;
- c. peluasan pengenaan duti eksais ke atas produk minuman bergula;

- d. pelaksanaan nombor pengenalan cukai (atau TIN) bagi memperluaskan asas cukai pendapatan;
 - e. memperkenalkan Cukai Makmur secara *one-off* kepada syarikat selain Perusahaan Mikro, Kecil dan Sederhana (atau PMKS) yang menjana keuntungan sebelum cukai melebihi 100 juta ringgit bagi tahun kewangan 2022; dan
 - f. pengenalan Program Khas Pengakuan Sukarela Jabatan Kastam Diraja Malaysia secara berfasa.
4. Melalui langkah-langkah ini, dijangka hampir 6.18 bilion ringgit dari segi cukai tambahan akan disumbang kepada hasil Kerajaan Persekutuan.
5. Selain itu, seperti yang diumumkan semasa pembentangan Bajet 2022, Kerajaan akan membentangkan Akta Tanggungjawab Fiskal pada 2022 di Dewan Yang Mulia ini dengan tujuan untuk meningkatkan tadbir urus, akauntabiliti dan ketelusan dalam pengurusan fiskal negara bagi memastikan kemampanan fiskal dan menyokong kestabilan ekonomi makro. Ini juga akan melihat pelaksanaan Strategi Hasil Jangka Sederhana, atau dengan izin, *Medium Term Revenue Strategy (MTRS)* untuk mengkaji dan menambah baik sistem percukaian sedia ada, memperluas asas hasil, memanfaatkan potensi sektor tidak formal, mengurangkan amalan terkurang lapor dan isytihar, mengurangkan ketirisan cukai serta menambah baik pentadbiran cukai melalui pengurusan data yang berkesan dan mengintegrasikan data dengan agensi berkaitan. Inisiatif daripada *MTRS* dijangka akan meningkatkan kutipan hasil Kerajaan Persekutuan serta merancakkan ekonomi negara dalam jangka sederhana.
6. Tambahan lagi, Kerajaan juga sedang melaksanakan Semakan Perbelanjaan Awam, atau dengan izin, *Public Expenditure Review* dengan kerjasama Bank Dunia bagi memastikan kecekapan dan keberkesanan perbelanjaan awam tanpa menjejaskan sistem penyampaian awam. Ini akan meningkatkan produktiviti perbelanjaan

awam bagi memastikan nilai faedah terbaik bagi setiap ringgit cukai yang dibayar oleh rakyat.

Tan Sri Yang di-Pertua,

7. Selain langkah peningkatan hasil, Kerajaan juga akan terus memantau peningkatan perbelanjaan mengurus, termasuklah emolumen agar mengambil kira ruang fiskal yang terhad.

8. Bagi memastikan Kerajaan terus mampu untuk membiayai komitmen bayaran emolumen yang dianggar mencatat 86.5 bilion ringgit pada tahun 2022, rasionalisasi perbelanjaan serta semakan dasar sedia ada akan sentiasa dilaksanakan berdasarkan keutamaan perbelanjaan, seiring dengan prestasi kutipan hasil tahunan.

9. Kerajaan juga akan sentiasa memastikan saiz penjawat awam berada pada had yang optimum bagi mengawal perbelanjaan ini. Di samping itu, Kerajaan turut mengkaji dan menyemak dasar sedia ada bagi perbelanjaan lain, seperti bayaran persaraan, dan subsidi, bagi memastikan ia tidak memberi beban jangka masa panjang ke atas kedudukan kewangan Kerajaan Persekutuan.

10. Pada masa yang sama, bagi memperkukuh kedudukan fiskal, Kerajaan mengguna pakai Rangka Kerja Fiskal Jangka Sederhana, atau dengan izin, *Medium Term Fiscal Framework (MTFF)* sebagai panduan dalam menggubal strategi ke arah konsolidasi fiskal jangka sederhana yang selari dengan pelan pembangunan Rancangan Malaysia Kedua Belas. Perancangan jangka sederhana ini penting bagi memastikan Kerajaan mempunyai ruang fiskal yang selesa dan mencukupi untuk melaksanakan program pembangunan dan langkah kitaran balas dalam menangani situasi luar jangka pada masa hadapan, sekiranya diperlukan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN
DARIPADA : DATUK DR. HASAN BIN BAHROM
TARIKH : [TAMPIN]
15 NOVEMBER 2021

SOALAN

DATUK DR. HASAN BIN BAHROM [TAMPIN] minta **MENTERI PERTANIAN DAN INDUSTRI MAKANAN** menyatakan keluasan tanah yang digunakan untuk padang ragut yang produktif dan tidak produktif, dan apakah langkah Kementerian bagi mendaya majukan padang ragut yang tidak produktif.

JAWAPAN

Tuan Yang Di Pertua,

Untuk makluman Ahli Yang Berhormat, pada tahun 2021, jumlah keluasan rizab padang ragut yang ditawarkan kepada penternak untuk diusahakan bagi aktiviti penternakan ialah seluas 29,312 hektar. Daripada jumlah tersebut, kira-kira 12,549 hektar kawasan padang ragut adalah produktif, manakala baki 16,763 hektar adalah tidak produktif.

Sehubungan dengan itu, bagi meningkatkan daya guna tanah di rizab padang ragut yang tidak produktif, Kementerian Pertanian dan Industri Makanan (MAFI) menerusi Jabatan Perkhidmatan Veterinar (DVS) telah mengambil langkah intervensi dengan menubuhkan Taman Kekal Pengeluaran Makanan (TKPM) di rizab padang ragut bagi menggalakkan pelaburan sektor swasta dan penyertaan golongan sasar dalam bidang pengeluaran makanan dan hasil ternakan.

Melalui penubuhan TKPM, MAFI menerusi DVS telah membangunkan 16 buah Ladang Satelit Nasional yang melibatkan pembinaan 72 unit kandang di tujuh (7) buah negeri iaitu di Kedah, Terengganu, Kelantan, Pahang, Perak, Negeri Sembilan dan Johor sebagai usaha untuk menggalakkan penglibatan pemain-pemain industri bagi menceburi bidang penternakan dengan kos awal operasi yang minima.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' SYED ABU HUSSIN BIN HAFIZ SYED
ABDUL FASAL (BUKIT GANTANG)**

TARIKH : 15 NOVEMBER 2021 (ISNIN)

SOALAN

DATO' SYED ABU HUSSIN BIN HAFIZ SYED ABDUL FASAL minta **MENTERI KANAN PENDIDIKAN** menyatakan kesediaan dan komitmen Kementerian dalam membangunkan infrastruktur sukan seperti stadium mini dan asrama di Sekolah Menengah Kebangsaan Toh Johan di bawah Mukim Trong berikutan keperluan infrastruktur tersebut yang sangat mendesak.

JAWAPAN

Tuan Yang di-Pertua,

Kementerian Pendidikan Malaysia (KPM) komited bagi memastikan sekolah mempunyai kemudahan infrastruktur yang bersesuaian dan berada dalam keadaan selamat untuk digunakan.

Untuk makluman Ahli Yang Berhormat, berdasarkan garis panduan pembinaan bangunan yang dikeluarkan oleh Unit Perancang Ekonomi (UPE), pembinaan kemudahan infrastruktur seperti stadium mini adalah tidak termasuk dalam brif projek bagi pembinaan sesebuah sekolah. Dalam konteks penyediaan infrastruktur sukan di SMK Toh Johan, KPM mendapati kemudahan sedia ada di sekolah tersebut mencukupi untuk membangunkan potensi murid dalam aspek sukan.

Bagi cadangan pembinaan kemudahan asrama di SMK Toh Johan, KPM mendapati tiada keperluan mendesak pada masa ini memandangkan sekolah berkenaan tidak menjalankan program kecemerlangan sukan seperti mana di Sekolah Sukan Malaysia atau Sekolah Sukan Negeri yang menetapkan atlet murid di sekolah berkenaan menginap di asrama sepenuhnya.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KE-EMPAT
PARLIMEN KE-EMPAT BELAS**

PERTANYAAN : JAWAB LISAN

**DARIPADA : YB TUAN MA'MUN BIN SULAIMAN
(KALABAKAN)**

TARIKH : 15 NOVEMBER 2021 (ISNIN)

SOALAN

TUAN MA'MUN BIN SULAIMAN [KALABAKAN] minta **MENTERI PENGANGKUTAN** menyatakan perkembangan terkini terhadap usaha memanjangkan landasan dan menaik taraf bangunan terminal Lapangan Terbang Tawau bagi menampung permintaan penggunaan pengangkutan udara untuk penumpang dan kargo pasti meningkat pasca pandemik COVID-19 seperti yang dicatatkan yakni Lapangan Terbang Tawau adalah lapangan terbang ketiga paling sibuk selepas Lapangan Terbang Antarabangsa Kuala Lumpur dan Lapangan Terbang Antarabangsa Kota Kinabalu.

JAWAPAN

Tuan Yang di-Pertua,

Kementerian Pengangkutan melalui Malaysia Airports Holdings Berhad (MAHB) telah melaksanakan beberapa perancangan untuk mempertingkatkan dan menaiktaraf perkhidmatan Lapangan Terbang Tawau melalui Pelan Pemodenan Lapangan Terbang Tawau yang dilancarkan pada 2018. Melalui pelan ini, antara lain, MAHB akan mempertingkatkan kapasiti pengendalian penumpang Lapangan Terbang Tawau daripada 1.5 juta penumpang setahun kepada 2.5 juta penumpang setahun.

Walau bagaimanapun, penularan wabak COVID-19 telah memberi kesan negatif terhadap industri penerbangan negara terutama kemampuan MAHB untuk membiayai projek tersebut. Dalam hubungan ini, syarikat penerbangan dijangka memerlukan tempoh masa sehingga 2025 untuk pulih sepenuhnya dari impak wabak COVID-19, tertakluk kepada situasi semasa penularan wabak tersebut di dalam dan luar negara.

Berdasarkan perkembangan terkini dan kekurangan permintaan dalam industri penerbangan negara, projek ini akan ditangguhkan sehinggalah industri penerbangan dipulihkan.

Pada masa yang sama, bagi memastikan keperluan pembangunan jangka panjang lapangan terbang/padang terbang di Malaysia berdasarkan keperluan industri semasa mengambil kira impak COVID-19 dan keperluan sistem jaringan kesalinghubungan pengangkutan negara, Kementerian Pengangkutan akan melaksanakan kajian *National Airports Strategic Plan* (NASP) yang akan bermula pada penghujung tahun 2021 dan dijangka akan dimuktamadkan pada pertengahan tahun 2023. Hasil daripada kajian ini nanti akan membantu perancangan masa hadapan bagi lapangan-lapangan terbang termasuk lapangan terbang Tawau dengan lebih jelas dan efektif berdasarkan *Evidence Based Planning*.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : YB TUAN SABRI BIN AZIT [JERAI]

TARIKH : 15 NOVEMBER 2021 (RABU)

SOALAN

Minta **MENTERI PENGAJIAN TINGGI** menyatakan langkah-langkah jangka pendek bagi memanfaatkan graduan jurusan agama yang semakin meningkat agar kelangsungan modal insan dapat dilestarikan untuk generasi muda pada hari ini.

JAWAPAN

Tuan Yang di-Pertua,

KPT amat memandang serius berhubung kelestarian kelangsungan modal insan bagi generasi muda pada hari ini terutamanya bagi graduan jurusan agama. Bagi tujuan tersebut dan juga bagi memanfaatkan graduan jurusan agama yang semakin meningkat ini, KPT telah melaksanakan beberapa inisiatif yang proaktif dan komprehensif kepada mereka bagi meningkatkan kemahiran dan seterusnya menjamin kebolehpasaran graduan mereka. Antara inisiatif-inisiatif yang telah dilaksanakan adalah seperti berikut:

i. Melaksanakan program latihan berbentuk *reskilling* dan *upskilling* melalui inisiatif PENJANA KPT-CAP (Career Advancement Program).

Melalui usaha ini, graduan Universiti Awam, IPTS, Politeknik serta Kolej Komuniti bagi tahun 2019, 2020 dan 2021 yang masih belum bekerja ditawarkan tempat untuk mengikuti program latihan berbentuk *reskilling* dan *upskilling*. Antara program yang mensasarkan graduan jurusan agama adalah seperti berikut:

- a) Certified Islamic Specialist in Takaful - 100 peserta
- b) Kursus Penasihat Kewangan Islam - 50 peserta
- c) Profesional Eksekutif Halal - 100 peserta
- d) Guru Ngaji Profesional - 15 peserta

Kesemua program ini telah memanfaatkan seramai 265 orang graduan. Selain itu, terdapat juga program-program umum yang boleh diikuti oleh graduan jurusan agama seperti program keusahawanan dan ekonomi gig.

ii. Melaksanakan Program Intervensi Kebolehpasaran Graduan (GE).

Program intervensi ini memberikan nilai tambah kepada graduan yang dikenal pasti rendah kadar kebolehpasarannya (CGPA 3.3 ke bawah) atau daripada program-program pengajian yang rendah kadar kebolehpasaran (kadar kebolehpasaran 50% ke bawah). Program ini turut menawarkan jaminan pekerjaan kepada peserta sebaik sahaja mereka menamatkan latihan. Pada tahun 2020 dan 2021, antara program yang diluluskan khas bagi graduan jurusan agama adalah seperti berikut:

- a) Certified Professional Shariah Auditor (CPSA) - 332 peserta
- b) Shariah Compliance & Shariah Risk Management Executive Training (SCRMT) – 395 peserta
- c) Persijilan Teori Penyelesaian Masalah Intervensi (TRIZ) – 140 peserta
- d) Akademi Pendakwah Muda – 70 peserta
- e) Sijil Kemahiran Khas Pengajaran Quran Isyarat (KPQI) – 20 peserta

Kesemua program ini telah memanfaatkan seramai 957 orang graduan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : TUAN KHOO POAY TIONG
[KOTA MELAKA]
TARIKH : 15 NOVEMBER 2021 (ISNIN)

SOALAN

TUAN KHOO POAY TIONG [KOTA MELAKA] minta **MENTERI KEWANGAN** menyatakan :

(a) kedudukan terkini nisbah hutang isi rumah kepada Keluaran Dalam Negara Kasar (KDNK); dan

(b) apakah kesan kadar hutang isi rumah ini kepada ekonomi negara dan langkah-langkah yang diambil oleh Kerajaan mengawalinya.

JAWAPAN

Tan Sri Yang di-Pertua,

1. Untuk makluman ahli Yang Berhormat, pada akhir Jun 2021, hutang isi rumah adalah lebih dari 1.34 trilion ringgit, atau 89.6 peratus daripada KDNK. Ini merupakan penurunan berbanding tahap yang dicatatkan pada Disember 2020, iaitu 93.2 peratus.

2. Walaupun tahap keberhutangan isi rumah dilihat sebagai membimbangkan, namun, salah satu faktor yang menyumbang kepada hutang isi rumah adalah berkait dengan pembinaan kekayaan. Sebagai contoh, sekitar 70 peratus daripada pinjaman baru pada separuh pertama tahun ini disalurkan kepada golongan pendapatan menengah dan ke atas, di mana 40 peratus daripada jumlah ini adalah berkait dengan pembelian hartanah.

3. Selain itu, kebanyakan isi rumah masih meminjam mengikut kemampuan mereka dengan nisbah khidmat hutang atau dengan izin, *Debt Service Ratio (DSR)*, kekal dalam lingkungan paras berhemat. Ini disokong oleh daya tahan kewangan isi rumah dengan penamparan kewangan yang mencukupi. Setakat ini, nisbah aset kewangan isi rumah kepada hutang kekal pada paras 2.2 kali, melebihi ambang berhemat sebanyak 1 kali ganda.

4. Faktor lain yang turut menyumbang kepada kemampuan pembayaran balik hutang isi rumah termasuklah pengurangan Kadar Dasar Semalaman, atau dengan izin, *OPR* sebanyak 125 mata asas sejak Januari 2020. Ini telah mengurangkan ansuran pinjaman bulanan bagi kebanyakan peminjam isi rumah, di mana lebih kurang 70 peratus daripada hutang mereka adalah dalam bentuk pinjaman kadar terapung.

Tan Sri Yang di-Pertua,

5. Tidak dinafikan, kesan peningkatan kadar hutang isi rumah yang tidak terkawal boleh menimbulkan kekangan kepada pertumbuhan

ekonomi pada masa hadapan, kerana sebahagian besar daripada pendapatan mereka perlu digunakan untuk membayar hutang. Ini secara tidak langsung akan menyebabkan pendapatan boleh guna isi rumah berkurangan, seterusnya memberi kesan ke atas perbelanjaan terhadap barangan dan perkhidmatan asas yang lain.

6. Namun, susulan kejayaan Pelan Pemulihan Negara (PPN) dan Program Imunisasi COVID-19 Kebangsaan (PICK), kesan tahap keberhutangan isi rumah terhadap ekonomi dijangka terkawal.

7. Ini didorong oleh pembukaan semula sektor ekonomi dan aktiviti sosial dengan lebih meluas susulah peralihan lebih banyak negeri ke Fasa 4 PPN. Kini, lebih 90 peratus sektor ekonomi sudah mula beroperasi, dan kita dapat lihat pemulihan di dalam pasaran buruh, termasuk pertumbuhan berterusan guna tenaga dan upah. Setakat September 2021, kadar pengangguran terus bertambah baik kepada 4.5 peratus, di mana bilangan penduduk bekerja terus meningkat sebanyak 86,900 ribu orang, dengan jumlah 15.46 juta orang.

8. Pada masa yang sama, Kerajaan telah memperkenalkan pelbagai bantuan bayaran balik pinjaman sama ada secara menyeluruh atau bersasar, termasuklah perlindungan dari segi perundangan melalui Akta Langkah-Langkah Sementara bagi Mengurangkan Kesan Penyakit Koronavirus 2019 (Covid-19) 2020 [Akta 829]. Ini turut dilengkapi oleh bantuan tunai langsung untuk rakyat berjumlah 33 bilion ringgit yang telah memanfaatkan lebih dari 10 juta penerima.

9. Melangkah ke hadapan, dengan momentum pemulihan ekonomi yang dijangka akan berterusan sepanjang suku keempat 2021 hingga ke hujung tahun hadapan, Bajet 2022 tetap memastikan kesinambungan bantuan tunai secara langsung berjumlah 8.2 bilion ringgit, memanfaatkan 9.6 juta penerima. Selain itu, Kerajaan juga memperuntukkan 4.8 bilion dalam menyediakan 600 ribu peluang pekerjaan pada tahun hadapan di bawah inisiatif Jamin Kerja Keluarga Malaysia.

Tan Sri Yang di-Pertua,

10. Dalam mengurangkan risiko peningkatan hutang isi rumah, serta meningkatkan kesedaran rakyat mengenai pengurusan kewangan secara berhemah, Kerajaan dengan usaha sama Bank Negara akan terus:

- **Pertama**, melaksanakan Garis Panduan Pembiayaan Bertanggungjawab, atau dengan izin *Guidelines on Responsible Financing*) untuk membantu memastikan individu meminjam mengikut kemampuan masing-masing untuk mengelakkan bebanan hutang yang berlebihan; dan
- **Kedua**, berusaha meningkatkan tahap celik kewangan rakyat agar pengguna perkhidmatan kewangan mempunyai keupayaan dan berkeyakinan untuk membuat keputusan kewangan yang baik. Ini akan diusahakan melalui pelbagai inisiatif di bawah Jaringan Pendidikan Kewangan, atau dengan izin, *Financial Education Network* (atau FEN).

11. Di samping itu, Kerajaan juga menggalakkan penggunaan perkhidmatan **Agensi Kaunseling dan Pengurusan Kredit** (atau AKPK) oleh isi rumah dan Perusahaan Mikro, Kecil dan Sederhana yang mempunyai masalah pengurusan hutang untuk mempunyai tahap kewangan yang kukuh melalui pendidikan, khidmat nasihat kewangan serta khidmat pengurusan kredit.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

**DARIPADA : TUAN YUSUF BIN ABD. WAHAB
[TANJONG MANIS]**

TARIKH : 15 NOVEMBER 2021 (ISNIN)

SOALAN

TUAN YUSUF BIN ABD. WAHAB [TANJONG MANIS] minta **MENTERI PERTANIAN DAN INDUSTRI MAKANAN** menyatakan bilakah pengeluaran lesen Nelayan Pantai (Zon A) yang dibekukan selama ini akan dibuka semula. Pembekuan lesen ini telah menjejaskan peluang nelayan-nelayan di Parlimen Tanjong Manis untuk mendapatkan bantuan-bantuan dari Kerajaan.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) melalui Jabatan Perikanan Malaysia (DOF) telah membekukan semua pengeluaran lesen/permit vesel menangkap ikan bagi Zon A, B dan C sejak tahun 1982 kecuali vesel menangkap ikan yang beroperasi di laut dalam iaitu Zon C2 di Pantai Timur Semenanjung Malaysia, Sabah dan Sarawak serta Zon C3.

Pembekuan ini dibuat dengan mengambil kira status sumber perikanan yang terdapat di perairan negara dan tahap tampungan bilangan vesel penangkapan ikan sedia ada yang beroperasi di dalam perairan Malaysia telah mencapai tahap yang optimum. Selain status sumber, kawalan ini adalah berdasarkan komitmen negara terhadap peraturan antarabangsa di bawah *Food and Agriculture Organization* (FAO) bagi menjamin sumber perikanan agar dapat diteroka dengan mapan. MAFI turut menggalakkan penyertaan di dalam sektor bukan perikanan tangkapan seperti akuakultur sebagai salah satu medium dalam meningkatkan pendapatan dan tidak bergantung pada perikanan tangkapan semata-mata.

Penemuan Survei Pentaksiran Sumber yang dijalankan pada tahun 2013 hingga 2016 dan kajian-kajian lain yang berkaitan menunjukkan bahawa nilai biomass bagi stok sumber perikanan di Malaysia telah mencapai tahap yang kritikal. Paras biomass yang sangat rendah iaitu hanya berbaki 3% di Pantai Timur Semenanjung Malaysia dan 4% di Pantai Barat Semenanjung Malaysia menunjukkan bahawa sumber perikanan demersal telah dieksploitasi secara berlebihan. Beberapa langkah segera wajar diambil sebelum paras biomass ini menurun kepada tahap yang tidak boleh dipulihkan lagi.

Bagi pembukaan semula lesen nelayan di zon-zon yang berkaitan, MAFI melalui DOF akan mempertimbangkan kelulusan lesen sampan khas tertakluk kepada proses pemutihan yang dijalankan dari semasa ke semasa dan ianya tertakluk juga kepada keupayaan daya

tampungannya (*carrying capacity*) sesebuah kawasan berbanding dengan sumber perikanan sedia ada. Ini adalah untuk memastikan sumber perikanan dapat diuruskan secara mapan, mengurangkan kesesakan di zon tangkapan serta konflik dalam kalangan nelayan.

Bagi memastikan pendapatan nelayan di Zon A tidak terjejas, antara lain, MAFI juga telah berusaha menubuhkan sebanyak 13 myKomuniti Perikanan (myKP) untuk nelayan pantai yang mewakili 13 negeri (tidak termasuk Negeri Sabah). Penubuhan myKP adalah bertujuan untuk melahirkan komuniti perikanan yang mampu bekerjasama dalam melaksanakan aktiviti harian meliputi aktiviti penangkapan ikan, ternakan akuakultur dan peluang ekonomi perikanan dengan memberikan penekanan terhadap pengurusan sumber perikanan setempat sebagai teras ekonomi komuniti perikanan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : TUAN SANISVARA NETHAJI RAYER A/L
RAJAJI [JELUTONG]
TARIKH : 15 NOVEMBER 2021 (ISNIN)

SOALAN

TUAN SANISVARA NETHAJI RAYER A/L RAJAJI [JELUTONG] minta **MENTERI KEWANGAN** menyatakan apakah langkah-langkah yang akan diambil oleh Kerajaan Persekutuan untuk memulihkan projek kereta kabel di Bukit Bendera Pulau Pinang.

JAWAPAN

Tan Sri Yang di-Pertua,

1. Untuk makluman ahli Yang Berhormat, semenjak pandemik COVID-19 melanda negara, Kerajaan telah berhadapan dengan pelbagai cabaran, termasuklah kedudukan kewangan yang terhad akibat kutipan hasil yang terjejas.

2. Namun, Kerajaan kekal komited dalam melindungi nyawa dan mata pencarian rakyat, kelangsungan perniagaan dan pemulihan ekonomi. Ini telah dibuktikan melalui lapan pakej bantuan dan rangsangan ekonomi berjumlah 530 bilion ringgit yang telah dilaksanakan semenjak Mac 2020.

3. Pada masa yang sama, Kerajaan juga perlu memberikan keutamaan kepada pelaksanaan Pelan Pemulihan Ekonomi (PPN), serta Program Imunisasi COVID-19 Kebangsaan (PICK) bagi memastikan penularan pandemik terkawal, dan sektor-sektor ekonomi dan aktiviti sosial dapat dijalankan semula dengan selamat.

4. Sehubungan itu, Kerajaan terpaksa menyemak semula beberapa inisiatif dan langkah yang telah diperkenalkan dalam Belanjawan 2020, termasuklah projek kereta kabel Bukit Bendera.

5. Kini, tanda pemulihan ekonomi mula kelihatan susulan kejayaan PPN dan juga PICK di mana hampir semua negeri telahpun beralih ke Fasa 4, dan lebih dari 75 peratus keseluruhan populasi negara sudahpun lengkap divaksinasi. Ini telah membenarkan Kerajaan untuk memastikan kesinambungan projek infrastruktur yang mempunyai nilai pengganda yang tinggi.

6. Sehubungan itu, Kerajaan Negeri dijemput untuk membuat permohonan bagi melaksanakan projek ini kepada Kerajaan Persekutuan melalui kementerian yang berkenaan. Permohonan ini seterusnya akan dipanjangkan ke Unit Perancang Ekonomi, Jabatan Perdana Menteri bagi penilaian yang seterusnya, tertakluk kepada keperluan kritikal dan kedudukan kewangan semasa Kerajaan Persekutuan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI AHMAD JAZLAN BIN
YAAKUB [MACHANG]**

TARIKH : 15 NOVEMBER 2021 (ISNIN)

SOALAN

DATUK HAJI AHMAD JAZLAN BIN YAAKUB [MACHANG] minta **MENTERI TENAGA DAN SUMBER ASLI** menyatakan apakah tindakan Kementerian dalam memperluas penggunaan tenaga solar di setiap rumah penduduk Malaysia sebagai satu usaha mengetengahkan sumber tenaga hijau khususnya untuk rakyat Orang Asli di Kelantan.

JAWAPAN

Tuan Yang di-Pertua,

1. Bagi memperluas penggunaan tenaga solar bagi setiap penduduk di Malaysia, Kerajaan telah mengenal pasti potensi bumbung rumah-rumah kediaman di negara ini bagi pemasangan sistem solar fotovolta atau solar PV. Satu program khas yang dinamakan *Net Energy Metering* atau NEM Rakyat telah diperkenalkan bagi menggalakkan pemasangan sistem solar PV di bumbung rumah.
2. Melalui program ini, pemilik rumah boleh menggunakan tenaga solar yang dijana untuk kegunaan sendiri. Lebihan tenaga yang tidak digunakan pula boleh dijual kepada pihak utiliti pada kadar tarif yang sama dengan kadar tarif yang dibeli daripada pihak utiliti. Dianggarkan sebanyak 40,000 hingga 100,000 pengguna domestik akan mendapat manfaat daripada program ini.
3. Bagi membekalkan elektrik ke kawasan terpencil yang jauh dari grid nasional seperti di penempatan Orang Asli di Kelantan, Kerajaan melalui Program Bekalan Elektrik Luar Bandar di bawah Kementerian Pembangunan Luar Bandar turut menggunakan solar hibrid di kawasan-kawasan tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN MA'MUN BIN SULAIMAN
(KALABAKAN)**

TARIKH : 15 NOVEMBER 2021 (ISNIN)

SOALAN

TUAN MA'MUN BIN SULAIMAN minta **MENTERI KANAN PENDIDIKAN** menyatakan :-

- (a) perancangan dalam membina sekolah baru untuk menggantikan Sekolah Menengah Kebangsaan Kalabakan yang usang, kurang kelengkapan dan ianya merupakan satu- satu sekolah menengah yang ada di Pekan Kalabakan; dan
- (b) adakah perancangan Kementerian untuk membina sebuah sekolah berasrama yang baru untuk menampung keperluan murid-murid berasal dari ladang-ladang yang berlokasi jauh.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam usaha menyediakan prasarana dan kemudahan infrastruktur pendidikan kepada semua murid di seluruh negara.

Untuk makluman Ahli Yang Berhormat, KPM telah mengenal pasti keperluan untuk melaksanakan pembinaan bangunan gantian yang daif di SMK Kalabakan. Berdasarkan analisis skor impak KPM, bangunan di SMK Kalabakan dikategorikan pada skala 6. Pada masa ini, KPM sedang mendapatkan kelulusan pengesahan tidak selamat dan syor roboh daripada pihak Jabatan Kerja Raya Sabah (JKR Sabah).

Walau bagaimanapun, semakan KPM mendapati bahawa tapak tanah sekolah sedia ada masih belum berstatus hakmilik Pesuruhjaya Tanah Persekutuan (PTP). Sehubungan itu, urusan perolehan tapak sekolah akan diselesaikan terlebih dahulu sebelum sebarang permohonan penggantian bangunan SMK Kalabakan dikemukakan untuk pertimbangan dan kelulusan agensi pusat.

Untuk makluman Ahli Yang Berhormat, berhubung pertanyaan tentang pembinaan sekolah berasrama bagi keperluan murid yang berasal dari ladang, KPM mendapati bahawa terdapat keperluan untuk membina sekolah baharu berasrama di kawasan ladang tersebut. Pada masa ini, KPM sedang meneliti lokasi dan tapak tanah yang bersesuaian. Permohonan pembina sekolah baharu tersebut akan dikemukakan untuk kelulusan agensi pusat setelah urusan pindah milik tapak tersebut selesai.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : PUAN JUNE LEOW HSIAD HUI
(HULU SELANGOR)**

TARIKH : 15 NOVEMBER 2021 (ISNIN)

SOALAN

PUAN JUNE LEOW HSIAD HUI minta **MENTERI KANAN PENDIDIKAN** menyatakan sejauh mana dasar Sekolah Milik Masyarakat yang telah diperkenalkan dapat membantu Kementerian dan berapa sumbangan dan bantuan yang telah diterima oleh Kementerian setakat ini.

JAWAPAN

Tuan Yang di-Pertua,

Sekolah Milik Masyarakat (SMM) merujuk kepada kerjasama dan pelibatan masyarakat dalam membantu Kementerian Pendidikan Malaysia (KPM) merealisasikan pembangunan pendidikan di sekolah. Hasrat utama dasar ini adalah untuk menggalakkan masyarakat menjalankan tanggungjawab sosial dengan memberi sumbangan dalam membangunkan sekolah sama ada dalam pembangunan fizikal atau modal insan di sekolah berkenaan bagi memenuhi aspirasi pendidikan negara.

KPM telah mengeluarkan Surat Pekeliling Ikhtisas Kementerian Pendidikan Malaysia Bilangan 3 Tahun 2018: Panduan Penyaluran dan Penerimaan Sumbangan daripada Sektor Swasta dan Bukan Swasta kepada Sekolah Kerajaan dan Sekolah Bantuan Kerajaan Kementerian Pendidikan Malaysia. Surat pekeliling ikhtisas ini merupakan panduan

penyaluran dan penerimaan sumbangan daripada sektor swasta dan bukan swasta kepada sekolah kerajaan dan sekolah bantuan kerajaan.

KPM juga telah mewujudkan Inisiatif Pelibatan Ibu Bapa, Komuniti dan Pihak Swasta (PIBKS) dalam pendidikan untuk meningkatkan akses dan kualiti di sekolah dengan kerjasama serta komitmen ibu bapa, komuniti dan pihak swasta.

Untuk makluman Ahli Yang Berhormat, berdasarkan pelaporan e-PIBKS sehingga pertengahan tahun 2021, anggaran sumbangan dan bantuan yang telah disalurkan kepada sekolah di seluruh negara adalah sebanyak RM183 juta. Sumbangan dan bantuan ini melibatkan seramai 38,105 penaja.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DR. MASZLEE BIN MALIK
(SIMPANG RENGAM)**

TARIKH : 15 NOVEMBER 2021 (ISNIN)

SOALAN

DR. MASZLEE BIN MALIK (SIMPANG RENGAM) minta **MENTERI KANAN PENDIDIKAN** menyatakan apakah Kementerian bercadang untuk memperkenalkan semula Program Sarapan Pagi (PSP) percuma pada tahun 2022 nanti kepada semua murid-murid sekolah rendah di seluruh negara demi membantu rakyat, ibu bapa, para pengusaha kantin dan pembekal bahan basah yang sedang bergelut pasca wabak COVID-19.

JAWAPAN

Tuan Yang di-Pertua,

Untuk makluman Ahli Yang Berhormat, Mesyuarat Jemaah Menteri pada 15 Januari 2020 telah memutuskan untuk tidak meneruskan Program Sarapan Pagi (PSP) dan program rancangan makanan sedia ada untuk murid sekolah rendah, iaitu Program Rancangan Makanan Tambahan (RMT) diteruskan dengan penambahbaikan. Oleh yang demikian, Kementerian Pendidikan Malaysia (KPM) akan terus melaksanakan program Rancangan Makanan Tambahan (RMT) dan Program Susu Sekolah (PSS) kepada murid B40 yang layak di sekolah rendah.

KPM yakin pelaksanaan RMT pada Ketika ini dapat memberi impak positif kepada keadaan kesihatan, fizikal dan amalan pemakanan sihat oleh murid sekolah rendah khususnya murid B40.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

DARIPADA : TUAN AHMAD BIN HASSAN [PAPAR]

TARIKH : 15 NOVEMBER 2021

SOALAN

TUAN AHMAD BIN HASSAN [PAPAR] minta **MENTERI PERTANIAN DAN INDUSTRI MAKANAN** menyatakan jenis bantuan yang disediakan Kementerian kepada nelayan pantai di Sabah khususnya nelayan di Parlimen Papar sejak pandemik COVID-19 sehingga kini.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) sememangnya prihatin dengan masalah yang dihadapi oleh nelayan-nelayan pesisir pantai khususnya semasa pandemik Covid-19. Pelbagai bentuk bantuan disediakan dan diberikan kepada nelayan yang terjejas khususnya nelayan di Parlimen Papar. Antaranya ialah:

- i. Bantuan Elaun Sara Hidup Nelayan (ESHN) berjumlah RM300.00 sebulan. Sehingga September 2021, seramai 310 orang nelayan di Papar telah menerima ESHN dengan nilai RM763,263.20;
- ii. Subsidi Minyak Diesel dan Petrol bagi menampung sebahagian dari kos operasi penangkapan ikan nelayan akibat dari kenaikan harga bahan api di pasaran. Seramai 251 pemilik vesel di Papar menerima manfaat ini sehingga September 2021 dengan jumlah minyak subsidi petrol yang telah disalurkan sebanyak 316,588 liter;
- iii. Bantuan Sabah Prihatin secara *one-off* sebanyak RM300.00. Bantuan ini telah diagihkan sebanyak 3 siri dengan jumlah RM900.00 seorang dan seramai 704 orang nelayan telah menerima bantuan ini;
- iv. Skim Perlindungan Nelayan diperkenalkan bertujuan untuk membela nasib keluarga nelayan sekiranya berlaku kejadian yang tidak diingini atau kemalangan yang melibatkan nelayan. Lembaga Kemajuan Ikan Malaysia (LKIM) mencarumkan nelayan di bawah Pertubuhan Keselamatan Sosial (PERKESO) dengan caruman tahunan sejumlah RM157.20. Data sehingga September 2021 merekodkan seramai 349 orang nelayan di Papar yang dicarumkan dengan nilai sebanyak RM54,862.80;

SOALAN NO : 27

- v. Bantuan Bencana Alam adalah bantuan dan sumbangan segera dalam bentuk kewangan kepada nelayan yang mengalami kemalangan, kemusnahan atau kerosakan harta benda dan kehilangan nyawa bagi meringankan beban mangsa dan keluarga. Bagi tahun 2021, seramai 19 orang penerima bantuan telah direkodkan dengan nilai bantuan sejumlah RM15,500.00;
- vi. Program Dana Nelayan bagi membantu menyediakan pinjaman mudah bagi pembelian bot dan peralatan baru atau meningkatkan keupayaan bot sedia ada. Seramai 429 penerima bantuan direkodkan di seluruh Negeri Sabah melibatkan peruntukan sebanyak RM4.2 juta. Seramai 99 penerima adalah daripada daerah Papar dengan nilai sebanyak RM990,000.00;
- vii. Bantuan bekalan makanan (*food basket*) untuk membantu meringankan beban yang dihadapi oleh golongan nelayan di daerah Papar yang terkesan dengan wabak pandemik Covid-19. Seramai 220 penerima bantuan di daerah Papar telah direkodkan sehingga September 2021 dengan nilai RM22,000.00;
- viii. Program Pembangunan Pelan Peningkatan Pendapatan Golongan B40: Nelayan Melalui Projek Tanaman Kontan melibatkan insentif *in-kind* yang diberikan kepada peserta dalam bentuk input pertanian, tenaga kerja, latihan dan khidmat nasihat teknikal serta elemen pemasaran hasil pertanian. Penerima bantuan daripada daerah Papar adalah seramai 20 orang dengan nilai bantuan sebanyak RM20,000.00;
- ix. Pembinaan unjam-unjam dan tukun tiruan bagi menambah sumber perikanan dan meningkatkan lokasi-lokasi tangkapan ikan khusus kepada nelayan tradisi dan persisiran pantai. Kementerian melaksanakan projek pembinaan unjam-unjam di pesisir perairan Papar melibatkan tiga (3) lokasi dengan nilai peruntukan sebanyak RM1,500,000.00 (Peruntukan pampasan daripada SOGT). Lokasi tersebut adalah seperti berikut:

SOALAN NO : 27

- i) Kuala Papar - 1,500 Unit / Jenis Kuboid
 - ii) Beringis - 1,500 Unit / Jenis Kuboid
 - iii) Pengalat - 1,500 Unit / Jenis Kubiod
- x. Program Pengembangan dan Perkhidmatan Perikanan Marin yang menawarkan pelbagai khidmat nasihat, kursus dan latihan in-situ kepada nelayan-nelayan melalui program bimbingan nelayan; dan
- xi. Projek Pembangunan Hiliran Perikanan yang mensasarkan kepada pemprosesan berasaskan produk perikanan dan memberikan bantuan dalam bentuk peralatan pemprosesan, khidmat nasihat dan teknikal terutamanya kepada isteri-isteri para nelayan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' MOHD. NIZAR BIN HAJI ZAKARIA
(PARIT)**

TARIKH : 15 NOVEMBER 2021 (ISNIN)

SOALAN

DATO' MOHD. NIZAR BIN HAJI ZAKARIA minta **MENTERI KANAN
PENDIDIKAN** menyatakan :-

- (a) sejauh manakah Kementerian melihat calon Sijil Pelajaran Malaysia (SPM) mempunyai waktu mencukupi untuk melakukan persiapan sebelum menduduki peperiksaan SPM menjelang Februari 2022; dan
- (b) adakah terdapat sebarang bentuk penilaian keadaan pelajar yang mengambil peperiksaan dalam persekitaran pandemik.

JAWAPAN

Tuan Yang di-Pertua,

Kementerian Pendidikan Malaysia (KPM) menyedari bahawa sesi persekolahan secara bersemuka untuk tahun 2020 dan tahun 2021 tidak dapat dilaksanakan seperti mana kebiasaan.

Sehubungan dengan itu, KPM telah membuat ketetapan untuk melanjutkan sesi persekolahan tahun 2021 sehingga bulan Februari 2022. Pelanjutan sesi persekolahan ini membolehkan pentadbir sekolah dan guru melaksanakan intervensi, pengukuhan dan pengayaan secara intensif termasuklah kepada calon peperiksaan SPM 2021.

Apabila sekolah dibuka mulai 3 Oktober 2021, calon peperiksaan juga diberi keutamaan mengikuti pengajaran dan pembelajaran (PdP) secara bersemuka di sekolah bagi memberi peluang kepada mereka membuat persediaan rapi sebelum menduduki peperiksaan.

KPM turut menyediakan rancangan dalam TV Pendidikan khusus untuk calon peperiksaan SPM. *Road to Success* dan *SUKSES SPM 2021* adalah antara rancangan yang berfokus kepada mata pelajaran SPM bagi membantu calon meningkatkan penguasaan kandungan kurikulum.

KPM juga membangunkan pelantar *Digital Educational Learning Initiative Malaysia* (DELIMa) sebagai pusat rujukan sehenti yang mengandungi pelbagai aplikasi, perkhidmatan dan sumber pendidikan digital seperti buku teks digital, video pendidikan, kuiz dan permainan pendidikan bagi tujuan PdP untuk kegunaan calon, guru dan ibu bapa.

Bagi membantu calon yang tidak mempunyai akses internet atau peranti yang sesuai, guru turut mengambil inisiatif untuk menyediakan modul PdP dan membuat serahan bahan tersebut kepada calon.

Untuk makluman Ahli Yang Berhormat, KPM turut mengambil kira situasi semasa pandemik COVID-19 dan persediaan calon peperiksaan sebelum menetapkan tarikh peperiksaan SPM 2021 pada Mac 2022. Bagi memastikan keselesaan, kesejahteraan dan keselamatan calon semasa menduduki peperiksaan, KPM telah mengeluarkan Garis Panduan Pengurusan Pentaksiran Pusat dan Peperiksaan Awam yang terkandung dalam Garis Panduan Pengurusan dan Pengoperasian Sekolah 3.0. Garis panduan ini merupakan rujukan kepada pegawai bahagian di KPM, jabatan pendidikan negeri (JPN), pejabat pendidikan daerah (PPD), pentadbir dan guru di sekolah, ibu bapa serta pihak yang terlibat dalam pengoperasian sekolah.

KPM yakin bahawa usaha ini memberi ruang dan peluang kepada calon untuk melakukan persediaan rapi termasuk aspek emosi sebelum menduduki peperiksaan dalam keadaan yang selesa dan bersedia sepenuhnya.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : TUAN CHA KEE CHIN [RASAH]
TARIKH : 15 NOVEMBER 2021 (ISNIN)

SOALAN

TUAN CHA KEE CHIN [RASAH] minta **MENTERI KEWANGAN** menyatakan apakah moratorium pinjaman perumahan dan kenderaan akan terus diberikan oleh bank-bank pada tahun 2022, memandangkan masih ada penduduk yang terjejas pendapatan mereka, walaupun negara bakal memasuki fasa endemik, kerana pendapatan mereka masih berkurang berbanding sebelum pandemik COVID-19.

JAWAPAN

Tan Sri Yang di-Pertua,

1. Untuk makluman ahli Yang Berhormat, dalam terus membantu golongan yang terjejas pendapatan, industri perbankan telah mengumumkan Skim Pengurusan dan Ketahanan Kewangan, atau URUS bagi golongan pendapatan 50 peratus terbawah (atau B50) pada 14 Oktober yang lalu. Golongan B50 yang layak ini ditakrifkan sebagai isi rumah berpendapatan sehingga 5,880 ringgit sebulan, dan masih terkesan akibat pandemik COVID-19.
2. Skim yang menyeluruh ini bukan sahaja membantu peminjam membuat pembayaran balik pinjaman mengikut kemampuan mereka, malah peminjam juga mendapat manfaat menerusi nasihat pengurusan kewangan yang boleh meningkatkan daya tahan kewangan mereka dalam jangka masa panjang.

3. Menerusi program ini, peminjam golongan B50 yang memenuhi syarat akan mendapat pengecualian faedah selama tiga bulan, dan juga pilihan untuk mengurangkan bayaran ansuran pinjaman sehingga 24 bulan secara keseluruhannya.
4. Bagi peminjam lain, termasuk golongan peniaga yang juga terkesan dan memerlukan bantuan bayaran balik pinjaman selepas pakej PEMULIH tamat, bank-bank akan terus menyediakan pakej bantuan, termasuk pengurangan bayaran ansuran bulanan mengikut kemampuan peminjam.
5. Di samping itu, peminjam juga boleh memohon pelbagai program yang ditawarkan oleh Agensi Kaunseling dan Pengurusan Kredit (atau AKPK), seperti Program Pengurusan Hutang, atau dengan izin, *Debt Management Programme*, Skim Penyelesaian Pinjaman Kecil, atau *Small Debt Resolution Scheme*, dan Skim Sokongan Daya Tahan Kewangan, atau *Financial Resilience Support Scheme*.
6. Program-program ini dilaksanakan dengan kerjasama dan sokongan institusi perbankan dan mempunyai ciri-ciri seperti ansuran bulanan yang boleh dikurangkan dengan pelanjutan tempoh bayaran balik dan program sokongan daya tahan kewangan.
7. Sekiranya peminjam menghadapi kesukaran semasa berurusan dengan pihak bank atau permohonan bantuan bayaran balik pinjaman ditolak, mereka boleh menghubungi Bank Negara Malaysia secara terus melalui BNM TELELINK.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

**DARIPADA : PUAN JUNE LEOW HSIAD HUI
[HULU SELANGOR]**

TARIKH : 15 NOVEMBER 2021

SOALAN

PUAN JUNE LEOW HSIAD HUI [HULU SELANGOR] minta **MENTERI PERTANIAN DAN INDUSTRI MAKANAN** menyatakan perkembangan terkini Taman Kekal Pengeluaran Makanan (TKPM) di seluruh negara, berapa dana awam yang telah digunakan dan berapa TKPM yang gagal diusahakan atau yang tidak diusahakan sehingga kini.

JAWAPAN

Tuan Yang Di Pertua,

Untuk makluman Ahli Yang Berhormat, Taman Kekal Pengeluaran Makanan (TKPM) merupakan sebahagian kawasan rizab yang diwartakan oleh Kerajaan Negeri bagi tujuan aktiviti-aktiviti berasaskan pertanian, akuakultur dan penternakan. Ini merupakan inisiatif yang dilaksanakan oleh Kementerian Pertanian dan Industri Makanan (MAFI) dengan kerjasama Kerajaan Negeri untuk menggalakkan pelaburan sektor swasta dan penyertaan golongan sasar dalam bidang pengeluaran agromakanan.

Kerajaan Persekutuan dan Kerajaan Negeri telah menandatangani memorandum persefahaman bagi pembangunan TKPM yang menggariskan tanggungjawab Kerajaan Persekutuan dan Kerajaan Negeri. Kerajaan Persekutuan melalui MAFI bertanggungjawab untuk menyediakan prasarana asas seperti jalan masuk, saliran utama, pengairan serta kemudahan bekalan air dan elektrik manakala Kerajaan Negeri bertanggungjawab untuk melantik peserta untuk mengusahakan tanah-tanah TKPM yang telah disediakan.

Sehingga tahun 2020, MAFI telah membangunkan kawasan-kawasan TKPM diseluruh negara seperti berikut:

1. 68 TKPM bagi sektor tanaman diseluruh negara dengan keluasan 9,500 hektar;
2. 72 unit kandang untuk ternakan lembu pedaging dan 5 buah kandang lembu tenusu dengan keluasan 10,019 hektar; dan
3. 49 kawasan TKPM – Zon Industri Akuakultur (ZIA) diseluruh negara dengan keluasan 28,172 hektar.

Jumlah peruntukan yang telah dibelanjakan untuk membangunkan TKPM diseluruh negara adalah seperti berikut:

1. TKPM Sektor Tanaman : RM376.80 juta
2. TKPM Sektor Ternakan : RM155.40 juta
3. TKPM Sektor Perikanan : RM146.75 juta

Jumlah nilai pengeluaran yang direkodkan daripada TKPM secara kumulatif sepanjang 5 tahun dari 2015 sehingga 2020 adalah sebanyak RM1.42 bilion. Limpahan ekonomi dari inisiatif TKPM ini dapat dilihat dengan nilai pengeluaran yang berganda dan menyumbang kepada Keluaran Dalam Kasar Negara (KDNK) dan pada masa yang sama dapat membantu petani dan penternak kecil meningkatkan pendapatan mereka.

Ini adalah sebahagian usaha Kerajaan untuk membantu dan menggalakkan penglibatan setiap lapisan masyarakat daripada golongan berpendapatan rendah sehingga pemain-pemain industri supaya menceburi bidang pertanian dengan meminimalkan kos awalan yang diperlukan. Projek-projek TKPM yang dibangunkan ini terbuka kepada penyertaan oleh petani, penternak, usahawan dan juga syarikat swasta dengan keluasan lot-lot yang ditetapkan secara sewaan tidak melebihi 3 tahun.

Proses permohonan dan temuduga pemohon adalah dijalankan oleh Jabatan Pertanian (DOA), Jabatan Perkhidmatan Veterinar (DVS) dan Jabatan Perikanan (DOF) di peringkat Negeri bersama wakil daripada agensi-agensi berkaitan di bawah MAFI untuk memastikan pemohon yang ditawarkan tempat di TKPM adalah layak dan berkemampuan untuk melaksanakan projek yang dicadangkan.

Prestasi peserta projek sentiasa dipantau melalui sasaran output yang telah ditetapkan. Bagi peserta yang berdaya maju dan berprestasi tinggi, tawaran untuk pembaharuan sewaan akan diberikan setelah tamat tempoh sewaan asal. Manakala peserta yang tidak memberikan komitmen atau tidak mencapai sasaran yang ditetapkan akan tindakan yang sewajarnya termasuk penamatan tempoh sewaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

DARIPADA : TUAN SIM TZE TZIN [BAYAN BARU]

TARIKH : 15 NOVEMBER 2021

SOALAN

TUAN SIM TZE TZIN [BAYAN BARU] minta **MENTERI PERTANIAN DAN INDUSTRI MAKANAN** menyatakan keadaan terkini dan langkah-langkah pencegahan penularan wabak *African Swine Fever* di dalam Malaysia. Apakah tindakan MAQIS dan DVS terhadap penyeludupan makanan proses seperti *luncheon meat* yang telah diharamkan sejak tahun 2019.

JAWAPAN

Tuan Yang Di Pertua,

Untuk makluman Ahli Yang Berhormat, keadaan penyakit *African Swine Fever* (ASF) dalam Negara adalah terkawal. Pada masa ini, kejadian penyakit ASF hanya disahkan berlaku di Negeri Sabah, manakala di Negeri Sarawak merupakan kes terpencil dan melibatkan babi hutan di kawasan sempadan Negeri Sabah dan Kalimantan Utara.

Bagi mengekang penyakit ASF dari terus merebak, Kementerian Pertanian dan Industri Makanan (MAFI) melalui Jabatan Perkhidmatan Veterinar (DVS) telah mengambil langkah-langkah berikut:

- i. melaksanakan sekatan pengimportan babi dan produk babi ke atas negara-negara yang mengalami wabak ASF;
- ii. melaksanakan pemeriksaan tanda-tanda klinikal ke atas babi komersial, *backyard* dan babi liar melalui program surveilan klinikal;
- iii. melaksanakan persampelan ke atas daging dan produk daging babi yang diimport daripada negara yang tiada dalam senarai sekatan pengimportan di pintu masuk negara;
- iv. mengadakan latihan di lapangan dan *table-top simulation* bersama agensi-agensi berkepentingan sebagai persediaan menangani wabak ASF;
- v. mengharamkan pergerakan keluar masuk ternakan babi dan produk babi dari kawasan yang diisytiharkan sebagai Kawasan Kawalan ASF kecuali mendapat kebenaran daripada pihak DVS;
- vi. memperketatkan kawalan pintu-pintu masuk Negara melalui:

- a) pemeriksaan dan penguatkuasaan di setiap pintu masuk Negara dipertingkatkan. Mana – mana produk babi yang berisiko dan didapati dibawa masuk tanpa dokumen pengimportan yang sah akan disita dan dilupuskan mengikut tatacara pelupusan yang telah ditetapkan di bawah peruntukan Akta Perkhidmatan Kuarantin dan Pemeriksaan Malaysia 2011 [Akta 728];
 - b) pelaksanaan *inflight announcement* dan meletakkan bunting/pamphlet/risalah bagi memastikan penumpang tidak membawa masuk produk berasaskan babi secara *handcarry*; dan
 - c) pengurusan pelupusan sisa makanan berasaskan babi dan produk babi dilaksanakan mengikut Prosedur Operasi Standard (SOP) yang ditetapkan.
- vii. menjalankan kempen kesedaran mengenai bahaya penyakit ASF melalui sesi libat urus, seminar/forum secara atas talian, *infographic poster*, video, pamphlet dan lain-lain kepada pihak-pihak berkepentingan; dan
- viii. menjalankan pemeriksaan berkala dari semasa ke semasa terhadap karkas dan produk berasaskan babi di pasaraya, pasar awam dan gudang sejuk beku.

Berkenaan dengan aduan penyeludupan produk *luncheon meat*, pemeriksaan mendapati produk yang dijual telah dibawa masuk sebelum larangan pengimportan dikuatkuasakan. MAFI menerusi DVS/Jabatan Perkhidmatan Kuarantin dan Pemeriksaan Malaysia (MAQIS) bersama-sama dengan Jabatan dan Agensi lain yang bertanggungjawab sentiasa berusaha dalam memastikan aktiviti penyeludupan dikekang serta terus mengambil tindakan terhadap sebarang aduan yang diterima.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN MUHAMMAD BAKHTIAR BIN WAN CHIK
[BALIK PULAU]**

TARIKH : 15 NOVEMBER 2021 (SELASA)

SOALAN

**TUAN MUHAMMAD BAKHTIAR BIN WAN CHIK [BALIK PULAU] minta
MENTERI PELANCONGAN, SENI DAN BUDAYA menyatakan :-**

- a) status penyenaraian tapak warisan dunia seperti Pusat Kawalan Kusta Negara, Hutan Simpan Royal Belum, Permatang Kuarza Gombak serta Taman Negara; dan
- b) usaha memelihara dan memulihara warisan sedia ada seperti Lembah Lenggong dan Georgetown demi mengelakkan penarikan semula status oleh UNESCO.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian Pelancongan, Seni dan Budaya (MOTAC) menerusi agensi di bawah seliaannya Jabatan Warisan Negara (JWN) sedang dalam proses menyediakan *dossier* untuk Pusat Kawalan Kusta Negara (PKKN) Sungai Buloh, Selangor dan Hutan Simpan Royal Belum, Perak dicalonkan untuk penyenaraian tapak warisan dunia.
2. Bagi tapak Permatang Kuarza, Gombak Selangor (PKGS) dan Taman Negara Semenanjung pula, ia kini dalam proses penyelidikan lanjut untuk mengenalpasti kriteria yang bersesuaian dan kepentingannya sebelum ia boleh diangkat menjadi Tapak Warisan Dunia UNESCO. Penyelidikan bagi Taman Negara Semenanjung turut membabitkan 3 pihak berkuasa negeri iaitu Kelantan, Pahang dan Terengganu.
3. Sementara itu, perhatian sentiasa diberikan kepada usaha untuk memelihara Tapak-Tapak Warisan Dunia di Malaysia termasuk di Melaka dan George Town, Pulau Pinang serta Lembah Lenggong, Perak. Setiap tapak yang telah diberi pengiktirafan perlu mematuhi Pelan Pengurusan Pemuliharaan (CMP) dan Rancangan Kawasan Khas (SAP) yang secara langsung dapat mengekalkan Nilai Keunggulan Sejagat (*Outstanding Universal Value*) agar integriti dan keasliannya kekal terpelihara.
4. Dalam hal ini, kerjasama semua pihak seperti Pihak Berkuasa Negeri, Pihak Berkuasa Tempatan dan pemilik tapak amat diperlukan. Pemantauan turut dilaksanakan melalui Mesyuarat Penyelarasan Pembangunan di Tapak Warisan, Warisan Kebangsaan dan Tapak Warisan Dunia untuk ulasan, nasihat serta kelulusan bagi kebenaran merancang selain daripada pemantauan oleh Pihak Berkuasa Tempatan sendiri.

Sekian, terima kasih

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI ANWAR BIN IBRAHIM
[PORT DICKSON]**

TARIKH : 15 NOVEMBER 2021 (ISNIN)

SOALAN

DATO' SERI ANWAR BIN IBRAHIM [PORT DICKSON] minta **MENTERI TENAGA DAN SUMBER ASLI** menyatakan berapa kos pembinaan, jangkaan siap bagi Empangan Hidroelektrik Nenggiri dan sejauh mana pembinaan empangan ini dapat mengawal banjir dan ekosistem setempat.

JAWAPAN

Tuan Yang di-Pertua,

1. Kos pembinaan Projek Hidroelektrik Nenggiri adalah dianggarkan berjumlah RM 5 billion dan tarikh operasi komersial telah ditetapkan pada 1 Jun 2027.
2. Tujuan utama pembinaan Projek Hidroelektrik Nenggiri ini adalah bagi tujuan penjanaan elektrik berasaskan hidro. Walau bagaimanapun, dengan pelaksanaan projek ini, ia secara tidak langsung akan membantu mengawal aliran air dari hulu sungai ke Sungai Kelantan dan seterusnya mampu untuk membantu mengatasi masalah banjir di negeri Kelantan.
3. Kerajaan sentiasa mengambil berat isu-isu berkaitan ekosistem dan alam sekitar di kawasan setempat. Isu-isu ini telah diambil kira di dalam laporan *Environmental Impact Assessment* (EIA) yang telah diluluskan oleh Jabatan Alam Sekitar pada April 2018. Sehubungan itu, Kerajaan akan memastikan pihak Tenaga Nasional Berhad (TNB) mematuhi kesemua arahan dan langkah-langkah mitigasi yang telah ditetapkan di dalam laporan EIA tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KE-EMPAT
PARLIMEN KE-EMPAT BELAS**

PERTANYAAN : JAWAB LISAN

**DARIPADA : YB DATUK MOHAMADDIN BIN KETAPI
(LAHAD DATU)**

TARIKH : 15 NOVEMBER 2021 (ISNIN)

SOALAN

DATUK MOHAMADDIN BIN KETAPI [LAHAD DATU] minta **MENTERI PENGANGKUTAN** menyatakan cadangan menaik taraf atau membina baru Lapangan Terbang Lahad Datu, anggaran kos, sumber kewangan dan bilakah ianya akan dimulakan.

JAWAPAN

Tuan Yang di-Pertua,

Sebarang cadangan untuk menaik taraf atau membina baru Lapangan Terbang Lahad Datu akan dipertimbangkan mengambil kira kemampuan kewangan Kerajaan. Di samping itu, cadangan tersebut juga adalah tertakluk kepada Kajian Pelan Strategik Lapangan Terbang Negara (NASP) yang akan dimulakan pada penghujung tahun 2021 bagi semua 42 lapangan terbang sedia ada.

Sebarang cadangan untuk menaik taraf atau membina lapangan terbang baharu perlu disokong oleh unjuran-unjuran yang realistik dan tepat, khususnya unjuran permintaan perkhidmatan penumpang dan kargo serta komitmen syarikat penerbangan yang ingin menggunakan Lapangan Terbang Lahad Datu, lebih-lebih lagi dalam era pasca COVID-19.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI DR. HAJI DZULKEFLY BIN
AHMAD [KUALA SELANGOR]**

TARIKH : 15 NOVEMBER 2021 (ISNIN)

SOALAN

Minta **MENTERI PENGAJIAN TINGGI** menyatakan sejauh mana universiti-universiti tempatan awam dan swasta, mengubah suai kursus-kursus yang ditawarkan bagi menyesuaikan kehendak pasaran dalam menangani isu kronik 'mismatch', sejak MQA mengizinkan mengubah modul pengajian serta pengenalan 'hybrid degree regulation'.

JAWAPAN

Tuan Yang Di-Pertua,

Kementerian Pengajian Tinggi (KPT) sentiasa komited dalam memastikan graduan yang dilahirkan oleh Institusi Pengajian Tinggi (IPT) dapat menyumbang kepada pembangunan negara. Justeru, menjadi fokus KPT juga agar tidak berlaku jurang kemahiran atau kompetensi graduan yang ketara dengan keperluan industri.

Bagi maksud ini, KPT telah mengambil beberapa langkah proaktif. Antara yang boleh saya kongsi di sini ialah:

- (i) Pertama, **memperkenalkan Kurikulum Tersedia Masa Hadapan atau dengan izin, *Future Ready Curriculum (FRC)***. Terdapat tiga elemen utama FRC, iaitu Struktur Kurikulum Lentur dan Organik; Penyampaian Transformatif PdP; dan Pentaksiran Holistik. Dalam hubungan ini, surat edaran kepada IPT bertarikh 6 Disember 2018 telah dikeluarkan meminta supaya IPT mengadaptasi elemen FRC dalam program akademik baharu atau semakan kurikulum sedia ada;
- (ii) Kedua, **membenarkan penyedia pendidikan tinggi (PPT) untuk membuat perubahan kurikulum sehingga 30 peratus secara dalaman tanpa perlu melalui penilaian semula oleh Agensi Kelayakan Malaysia (MQA)**. Manakala bagi program-program di bawah seliaan badan professional, perubahan kurikulum adalah tertakluk kepada pengesahan badan profesional yang berkaitan. MQA akan membuat semakan secara berkala bagi memastikan program yang ditawarkan selaras dengan perkembangan semasa;
- (iii) Ketiga, **menjumudkan, membekukan atau melupuskan program-program akademik yang telah dikenal pasti tidak relevan melalui semakan oleh MQA**. Ini bagi memberikan laluan kepada penawaran program baharu yang lebih sesuai serta memenuhi keperluan industri sejajar dengan IR4.0;

- (iv) Keempat, KPT melalui MQA turut memperkenalkan **Kerangka Penawaran Program yang menggabungkan dua atau tiga bidang seperti Major dengan Pengkhususan, Dwi Major, Major Minor dan Pelbagai Bidang (Hibrid)** sebagai menunjukkan sokongan kepada elemen, dengan izin, *transdisciplinary* dalam *Higher Education 4.0*. Konsep ini mampu menggalakkan IPT meneroka bidang ilmu baharu dan seterusnya mereka bentuk program pengajian yang dinamik serta mampu menarik minat industri dalam konteks kebolehpasaran graduan; dan
- (v) Kelima, **memperkasakan program akademik menerusi inisiatif *Experiential Learning and Competency-Based Education Landscape (EXCEL)***. Inisiatif yang baru sahaja dilancarkan pada 15 Oktober 2021 ini secara tuntasnya bertujuan untuk menghasilkan graduan yang mempunyai daya tahan serta keupayaan untuk menghadapi dan menerima perubahan, atau dengan izin *resilient and change-ready talent*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN LARRY SOON @ LARRY SNG WEI
SHIEN (JULAU)**

TARIKH : 15 NOVEMBER 2021 (ISNIN)

SOALAN

TUAN LARRY SOON @ LARRY SNG WEI SHIEN minta **MENTERI KANAN PENDIDIKAN** menyatakan secara terperinci apakah bentuk inisiatif yang diberikan kepada pelajar miskin B40 di bawah program Tabung Cerdik dan jelaskan mengapa Sekolah Menengah Kebangsaan Pakan tidak disenaraikan di dalam program tersebut sedangkan Pakan adalah salah sebuah daerah termiskin di Malaysia.

JAWAPAN

Tuan Yang di-Pertua,

Inisiatif Tabung CERDIK adalah satu inisiatif pemberian peranti digital lengkap dengan plan data kepada 150,000 orang murid B40 yang dilaksanakan oleh Yayasan Hasanah, sebuah yayasan di bawah Khazanah Nasional. CERDIK merupakan satu inisiatif tanggung jawab sosial korporat (CSR) oleh syarikat berkaitan kerajaan (GLC) dan syarikat pelaburan berkaitan kerajaan (GLIC) bertujuan menyediakan peranti digital kepada murid B40 yang dikenal pasti. Yayasan Hasanah bertanggungjawab menguruskan sumbangan peranti digital termasuk plan data daripada GLC dan GLIC serta menyelaras penghantaran peranti digital ke pejabat pendidikan daerah (PPD). Manakala, Kementerian Pendidikan Malaysia (KPM) bertanggungjawab untuk mengenal pasti murid B40 yang layak

menerima peranti digital mengikut kriteria yang ditetapkan dan seterusnya menguruskan agihan peranti digital tersebut.

Untuk makluman Ahli Yang Berhormat, penetapan kriteria penerima peranti Tabung CERDIK telah dipersetujui dalam peringkat Jawatankuasa Pemandu dan Jawatankuasa Teknikal Inisiatif CERDIK. Kriteria pemilihan sekolah dan murid yang telah dipersetujui oleh Jawatankuasa adalah seperti berikut:

- i) murid B40 yang dikenal pasti di sekolah bawah KPM; dan
- ii) senarai sekolah rendah disusun mengikut kedudukan bilangan murid B40 tertinggi bagi kohort Tahun Empat di setiap PPD; dan
- iii) senarai sekolah menengah disusun mengikut kedudukan bilangan murid B40 tertinggi bagi kohort Tingkatan Tiga di setiap PPD; dan
- iv) pemilihan sekolah di setiap PPD dibuat dengan mengambil kira keseimbangan lokasi sekolah di kawasan bandar dan luar bandar serta kemudahan capaian Internet dan bekalan elektrik di kawasan sekitarnya; dan
- v) bagi sekolah yang terpilih, setiap murid B40 dalam kohort Tahun Empat di sekolah rendah atau kohort Tingkatan Tiga di sekolah menengah akan menerima peranti digital Tabung CERDIK.

Oleh itu, Sekolah Menengah Kebangsaan Pakan tidak memenuhi salah satu kriteria yang ditetapkan khususnya capaian internet di kawasan sekitarnya. Namun begitu, sebanyak 337 unit peranti digital inisiatif Tabung CERDIK telah diagihkan kepada empat buah sekolah dalam Parlimen Julau.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : Y.B. DATO' SERI DR. WAN AZIZAH WAN
ISMAIL [PANDAN]
TARIKH : 15 NOVEMBER 2021 (ISNIN)

SOALAN

DATO' SERI DR. WAN AZIZAH WAN ISMAIL [PANDAN] minta **MENTERI KEWANGAN** menyatakan bilangan dan peratusan pencarum Kumpulan Wang Simpanan Pekerja dalam kalangan pencarum aktif berusia 45 tahun ke atas (kurang 15 tahun sebelum bersara) yang mempunyai jumlah tabungan kurang daripada RM50,000 pada 30 September 2021 berbanding pada 31 Disember 2019.

JAWAPAN

Tan Sri Yang di-Pertua,

1. Untuk makluman Ahli Yang Berhormat, Ahli Aktif Kumpulan Wang Simpanan Pekerja, atau KWSP adalah merujuk kepada ahli yang mencarum sekurang-kurangnya satu (1) kali dalam tempoh 12 bulan yang terkini.

2. Berdasarkan takrifan ini, setakat 30 September 2021, bilangan Ahli Aktif KWSP yang berumur di antara 45 hingga 59 tahun mencatatkan penambahan seramai 55 ribu ahli kepada 1.62 juta, iaitu peningkatan sebanyak 3.5 peratus semenjak 31 Disember 2019 yang merekodkan 1.56 juta Ahli Aktif KWSP.

3. Daripada 1.62 juta Ahli Aktif KWSP ini, didapati 479 ribu atau 29.6 peratus mempunyai simpanan yang tidak melebihi 50 ribu ringgit. Ini merupakan perbezaan yang minimal berbanding 484 ribu atau 31.0 peratus pada akhir tahun 2019.

Tan Sri Yang di-Pertua,

4. Perlu ditekankan bahawa walaupun 70 peratus Ahli Aktif KWSP yang berumur di antara 45 hingga 59 tahun mempunyai jumlah simpanan yang melebihi 50 ribu ringgit, tahap ini bukanlah yang selesa bagi tujuan persaraan.

5. Secara amnya, amaun 50 ribu ringgit hanya cukup untuk memberi pendapatan persaraan sekitar 200 ringgit sebulan bagi 20 tahun, atau 1,000 ringgit sebulan untuk lebih kurang 4 tahun. Memandangkan golongan umur ini hanya memiliki tempoh kurang 15 tahun daripada umur persaraan, mereka berhadapan cabaran untuk membina simpanan persaraan yang mencukupi.

Tan Sri Yang di-Pertua,

6. Cabaran ini juga tidak terkecuali bagi ahli-ahli KWSP di dalam lingkungan umur yang lain. Ini terutamanya berikutan pengeluaran berjumlah 101 bilion ringgit susulan inisiatif i-Lestari, i-Sinar dan i-Citra, di mana seramai 6.1 juta ahli kini mempunyai kurang daripada 10 ribu ringgit di dalam akaun mereka. Daripada jumlah tersebut, seramai 3.6 juta mempunyai kurang daripada 1,000 ringgit.

7. Kejatuhan dalam jumlah simpanan ini ternyata lebih merisaukan untuk ahli Bumiputera, memandangkan seramai 78 peratus, atau lebih tiga perempat telah memohon untuk fasiliti pengeluaran tersebut. Akibatnya, seramai 4.4 juta, atau 54 peratus ahli Bumiputera kini mempunyai kurang daripada 10 ribu ringgit, dan 2.0 juta, atau 25 peratus, mempunyai kurang daripada 1,000 ringgit.

8. Tambahan lagi, pengagihan simpanan telah menjadi semakin tidak saksama. Kumpulan 40 peratus terbawah ahli KWSP yang merangkumi lebih kurang 5.0 juta ahli telah menyaksikan simpanan mereka jatuh sebanyak 38 peratus kepada hanya 8 bilion ringgit, menjadikan baki simpanan median sebanyak 1,005 ringgit.

9. Kumpulan 40 peratus pertengahan juga mengalami kejatuhan sebanyak 18 peratus kepada 155 bilion ringgit, atau baki median sebanyak 24,995 ringgit.

10. Hanya kumpulan 20 peratus teratas yang berumur di bawah 55 tahun menyaksikan kenaikan dalam simpanan, namun ini mencapai median berjumlah 152,043 ringgit, atau bersamaan dengan hanya 633 ringgit sebulan untuk 20 tahun.

11. Secara keseluruhan, walaupun ketiga-tiga inisiatif pengeluaran tersebut telah memberikan sedikit kelegaan kewangan kepada ahli sepanjang tempoh pandemik COVID-19, ini secara tidak langsung telah menjadikan mereka lebih rentan dan tanpa perlindungan persaraan. Sebagai contoh, 73 peratus, atau hampir tiga perempat ahli kini berada

dalam situasi serius di mana jumlah dana mereka tidak cukup untuk bersara melebihi paras kemiskinan.

12. KWSP telah menganggarkan bahawa ahli perlu bekerja antara 4 hingga 6 tahun secara tambahan untuk membina semula simpanan yang telah dikeluarkan semasa pandemik. Ini juga telah mengakibatkan kejatuhan yang ketara dalam peratusan ahli yang mencapai Simpanan Asas iaitu 240 ribu ringgit pada umur 55 tahun, daripada 36 peratus pada tahun 2020, kepada lebih kurang 27 peratus hujung tahun ini.

Tan Sri Yang di-Pertua,

13. Kerajaan, bersama pihak KWSP sedang berusaha dalam membantu ahli membina semula simpanan mereka demi masa depan persaraan mereka.

14. Pendirian Kerajaan kekal dalam memperkukuhkan agenda perlindungan sosial untuk Keluarga Malaysia. Usaha ini termasuklah melalui kesinambungan insentif i-Saraan dan Kasih Suri Keluarga Malaysia seperti yang diumumkan di dalam Bajet 2020.

15. Tambahan lagi, dalam memperkasa agenda perlindungan sosial, Majlis Perlindungan Sosial Malaysia (MySPC), yang dipengerusikan oleh YAB Perdana Menteri, kini sedang mengkaji pembaharuan asas kepada sistem perlindungan sosial negara.

16. Usaha-usaha ini sedikit sebanyak dapat membantu ke arah menangani sebarang kepincangan sistem perlindungan sosial negara untuk masyarakat rentan, bagi memastikan mereka diberi akses kepada mencapai taraf hidup minimum biarpun dalam persekitaran yang tidak dijangka.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : TUAN LOKE SIEW FOOK [SEREMBAN]
TARIKH : 15 NOVEMBER 2021 (ISNIN)

SOALAN

TUAN LOKE SIEW FOOK [SEREMBAN] minta **MENTERI KEWANGAN** menyatakan jumlah kutipan hasil cukai daripada kelulusan untuk cabutan khas nombor ramalan bagi tahun 2019, 2020 dan 2021 dan ke manakah hasil cukai ini disalurkan.

JAWAPAN

Tan Sri Yang di-Pertua,

1. Untuk makluman Yang Berhormat, jumlah hasil melalui kutipan cukai daripada kelulusan untuk Cabutan Khas Nombor Ramalan bagi tahun 2019, 2020 dan 2021 adalah seperti berikut:

Tahun	Kutipan Cukai Cabutan Khas (RM)
2019	113.29 Juta
2020	72.53 Juta
Sehingga September 2021	36.88 Juta

2. Hasil yang diperolehi daripada cabutan khas ini seterusnya akan disalurkan kepada Akaun Amanah Sumber Khas Kementerian Kewangan.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB PUAN KASTHURIRAANI A/P PATTO
[BATU KAWAN]**

TARIKH : 15 NOVEMBER 2021 (ISNIN)

SOALAN

PUAN KASTHURIRAANI A/P PATTO [BATU KAWAN] minta **MENTERI PEMBANGUNAN WANITA, KELUARGA DAN MASYARAKAT** menyatakan apakah pelan tindakan Kementerian untuk meminda undang-undang sivil dan Syariah untuk meningkatkan umur perkahwinan kepada secara mutlak dan bilakah usaha ini akan dilaksanakan.

JAWAPAN

Tuan Yang di-Pertua,

Usaha menaikkan had umur perkahwinan kepada 18 tahun merupakan salah satu strategi tempoh jangka masa panjang (2020-2025) di bawah Pelan Strategi Kebangsaan Bagi Menangani Punca Perkahwinan Bawah Umur. Pelan ini akan dilaksanakan secara bersepadu bagi menangani enam (6) punca perkahwinan bawah umur yang mana salah satu punca yang telah dikenal pasti ialah undang-undang longgar yang memperuntukkan permohonan berkahwin di bawah 18 tahun yang memerlukan tindakan penambahbaikan ke atas perundangan, peraturan dan garis panduan berkaitan perkahwinan supaya selari dengan dasar Kerajaan untuk memastikan perkembangan, kebajikan dan kesejahteraan kanak-kanak terjamin.

Antara program yang telah dirancang dalam pelaksanaan Pelan ini adalah mengadakan siri konsultasi penyeragaman umur minimum permohonan perkahwinan kepada 18 tahun dalam Undang-Undang Keluarga Islam, undang-undang adat bagi Orang Asli, serta etnik Sabah dan Sarawak serta mengadakan seminar dan latihan kepada pihak yang berwajib memberikan kebenaran permohonan perkahwinan bawah umur supaya mendapat pendedahan yang sewajarnya mengenai hak kanak-kanak termasuklah mengenai perkahwinan bawah umur.

Program-program ini diterajui oleh pelbagai agensi yang berkaitan iaitu Jabatan Kemajuan Islam Malaysia (JAKIM), Jabatan Kehakiman Syariah Malaysia (JKSM), Jabatan Pendaftaran Negara (JPN), Jabatan Kemajuan Orang Asli (JAKOA), Majlis Adat Istiadat Sarawak, dan Jabatan Hal Ehwal Anak Negeri Sabah.

Sehingga kini, antara program lain yang telah pun dilaksanakan ialah sesi konsultasi dan dialog bersama Pengarah Jabatan Agama Negeri dan Ketua Hakim Syarie Mahkamah Syariah mengenai isu perkahwinan kanak-kanak yang dianjurkan oleh Suruhanjaya Hak Asasi Manusia (SUHAKAM) pada 19 Januari 2021. Dalam hal ini, sokongan dan komitmen yang berterusan daripada semua pihak amatlah diperlukan bagi menjayakan pelaksanaan program dan tindakan di bawah Pelan ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

DARIPADA : TUAN AHMAD BIN HASSAN (PAPAR)

TARIKH : 15 NOVEMBER 2021

SOALAN

TUAN AHMAD BIN HASSAN [PAPAR] minta **MENTERI PERTANIAN DAN INDUSTRI MAKANAN** menyatakan adakah Kementerian bercadang untuk menaikkan Elaun Sara Hidup Nelayan (ESHN) kepada nelayan di Sabah dari RM300 kepada RM500 memandangkan kenaikan kos sara hidup dan harga barangan yang lebih tinggi berbanding Semenanjung.

JAWAPAN

Tuan Yang Di Pertua,

Untuk makluman Ahli Yang Berhormat, pada Januari 2019, pemberian Elaun Sara Hidup Nelayan (ESHN) telah diseragamkan dengan kadar bayaran RM200 kepada pemilik vesel zon A dan pekerja vesel zon A, B, C dan C2 yang layak dan bermula Januari 2020, pemberian ESHN telah dinaikkan kepada RM250 manakala pada tahun 2021 kadar bayaran dinaikkan lagi kepada RM300 sebulan.

Kementerian Pertanian dan Industri Makanan (MAFI) buat masa ini masih mengekalkan pemberian ESHN kepada nelayan tulen secara bersasar. MAFI akan sentiasa mengkaji mekanisme dan kaedah yang terbaik bagi menyalurkan bantuan khususnya untuk menangani kenaikan kos sara hidup nelayan. Sebarang kenaikan ESHN ini mengambil kira kesesuaian dan keperluan pada masa akan datang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : PUAN YEO BEE YIN [BAKRI]

TARIKH : 15 NOVEMBER 2021 (ISNIN)

SOALAN

PUAN YEO BEE YIN [BAKRI] minta **MENTERI TENAGA DAN SUMBER ASLI** menyatakan status terkini projek-projek di bawah LSS-3 dan LSS@MEnTARI.

JAWAPAN

Tuan Yang di-Pertua,

1. Untuk makluman Ahli Yang Berhormat, sehingga bulan Julai 2021, kemajuan projek-projek loji jana kuasa solar di bawah Program *Large Scale Solar* Pusingan Ke-3 (LSS-3) adalah dalam lingkungan 30% hingga 80%. Kesemua projek di bawah LSS-3 dijangka dapat disiapkan dan mula mengeksport tenaga elektrik ke grid menjelang akhir tahun 2022.
2. Bagi projek-projek di bawah LSS@MEnTARI yang diumumkan keputusannya pada bulan Mac 2021, kesemua pembida yang berjaya telah menandatangani Perjanjian Pembelian Tenaga (PP) dan sedang dalam proses mencapai *financial close*. Kerja-kerja tapak akan bermula selepas syarikat mencapai *financial close*.
3. Pelaksanaan projek-projek di bawah LSS-3 dan LSS@MEnTARI telah mengalami sedikit kelewatan disebabkan Perintah Kawalan Pergerakan (PKP) yang dikuatkuasakan Kerajaan sepanjang tahun 2021 ekoran penularan wabak Covid-19. Walau bagaimanapun, Kerajaan akan memastikan kelewatan ini tidak menjejaskan pencapaian sasaran 31% kapasiti Tenaga Boleh Baharu (TBB) dalam pembekalan elektrik negara menjelang tahun 2025 sebagaimana yang telah ditetapkan.

Sekian, terima kasih.